


天  
騎  
樓  
詩  
集

王  
寧  
早  
書  
局



PL  
2751  
.T5t  
v.1






FORM 100-100000  
JUL 13 1955  
U.S. DEPT. OF JUSTICE

天  
祥  
樓  
詩

鑒

壬戌立夏節

九月廿二日





2751  
T5t  
v.1

YORK UNIVERSITY


JUL 03 2001

EAST ASIAN STUDIES

天  
狗  
櫻  
餅  
集

壬戌立夏節

長片行人  
筆





松岑先生十四歲小影








松岑先生四十五歲小影








松岑先生十五歲小影







張序

昔人有言文章風氣隨時代而異固也吾以爲隨時代而異者風耳若氣則隨山川而異前例不勝舉論吾蘇之詩格則江南北不必同在宋若南之范石湖龔會之北之秦太虛陳後山在明若南之高青邱陳臥子北之劉永之汪朝宗邱克莊在清若南之吳梅村潘南村邵青門陳迦陵洪北江黃仲則趙甌北李申耆北之二汪次舟蛟門二吳次園野人魯通甫潘四農邱季貞鄧孝威其尤著者也或華或樸或晰或奧或夷或峻所謂格不必同也若其氣之稟乎山川則無不同蘇之爲地也山則南有江甯之鍾攝句容之句曲良常吳之穹窿靈岩洞庭無錫之九龍常熟之虞北有銅山之雲龍碭之碭東海之鬱林南通之狼大小不同皆炳炳著名於史志川則南有具區三江北有淮睢而長江貫乎其中尤天下知聞之形勝也而地處溫帶氣候又適中故士習好文而發爲詩歌無華樸無晰奧無夷峻玩其氣殆莫不清深而和雅吳江金君松岑好爲詩斐然有以自見吳江山川舊隸吳郡近代詩人若計若潘

若吳其與當時諸先輩鴻聲茂譽猶驂之靳焉金君生計潘吳三先生後翹才露穎  
極於學以爲工亦可謂卓犖不羣者矣其詩格近石湖又蛻其華而約其博飲其清  
而納其和不盡襲也今學者阿世方昌言以白話詩號召後進一若非白話不足云  
詩夫白話亦文章之要不獨詩然顧旣曰詩則詩可話而話不得卽爲詩而附和之  
者羣盲缶而雷鳴君猶守所學顚顚焉以古人爲法乎抑可謂空谷之足音矣屬一  
渡江以詩見示將刊而徵叙因書所見以還質之南通張謇




葉序

吾郡屬邑吳江爲詩人淵藪自唐末皮陸倡和結一代詩人之局流風歇絕五六百年迄明季先族祖天寥公一門風雅以能詩聞其後橫山元禮分干學山諸公祖孫父子繼世相仍宗風復振有清開國則有徐電發潘次耕兩太史以鴻詞登大科聯翩臺閣吳漢槎計甫草兩孝廉領袖江湖雍乾嘉道以來又有王載揚李玉淵郭頻伽袁籓生史仲文諸家與沈歸愚尙書袁隨園大令朝野同聲支拄壇坫前後逾四朝世稱吳中爲文學之朝宗經術首推吳縣惠紅豆一家崑山亭林一老詩則吳江一邑獨擅其能蓋歷五代宋元逮于朱明山川芳薄鬱積之氣至此乃大洩其英靈斯固運會風氣二者相須而成而亦諸先輩衣鉢親承諷誦不絕有以致之者也光宣之間新學大昌士不知學聲律旣廢釘鉸成風余數數省墓還吳同時若繆藝風學承家鞠裳侍講衆推儒林祭酒而皆不能詩遑問其他後進之士辛壬國變余避寇歸依祖庭卜居金閶與家印濂法曹過從最密一日出示天寥公瓊章祖姑兩畫



像卷中有費君仲深金君松岑各爲七古一章余一見驚嘆以爲近世安得有此雅才亟詢其里籍則皆吳江人約翌日走訪兩君而印濂已先爲通款曲訂文字交費君投贈五古一章過承推許引爲知音金君則出其天放屢詩稿屬爲點定余不工詩而兩君詩功之深則固能道其概略費君有韋廬詩鈔大抵由玉谿進窺老杜駸駸乎上掩初唐金君詩格調近高岑骨氣兼李杜卑者不失爲遺山道園余每語人金君詩皆千錘百鍊而成讀之極妥貼造之極艱辛君聞之欣然以爲余知甘苦也今海上遺黎盛倡江西一派生字澀句于山谷並不得皮毛湘中末學剽襲六朝其端肇于湘綺白香詩境日窮詩道益梗七子空廓鍾譚纖仄始必有人階之厲而後及于淪胥此余每與金君論詩所爲太息者也近人詩余所獨嗜者費金二君外則山陰俞恪士新建夏劍丞兩提學俞君已宿草著有觚庵詩鈔劍丞所爲映庵詩鈔板行日久余擬合爲四家詩鈔繕錄待刊以湘亂頻仍至今度閣未償所願今金君先仿聚珍版排印不以余不知詩敦促爲之序引余爲序余謂金君與費君詩同爲

吳江詩家後勁而金君尤深于文平時出入周秦諸子語策遷固融冶而得其天全義法不薄八家獨能窺其本原所自出故其爲詩與文通消息不肯爲苟同之辭吳江山水之清奇與太湖諸山別成一邱壑其人文之特秀秉受固自不同今吳崑經學日就式微而吳江詩人乃鼎鼎如此之盛讀金君之詩是又可以觀國風之隆替矣壬戌初伏同郡愚弟葉德輝拜序





路序


昔歲戊午識金子松岑於姑蘇相與拏小舟出楓橋躋天平絕頂振衣長嘯歸訪吳中諸名園流連池臺竹樹泉石之勝飲酒賦詩懽然恨相見之晚既別去遠客京師越四五年雖其間君嘗三至都下余亦再適吳皆造訪不值蹤迹恒不得合并然時以詩誦相贈答若吾兩人者形固疏神常接也君少負大志於書無所不讀有清之季詔開經濟特科當道以君應疾時政叢脞不赴及國變後海內多故所蘊蓄喋不獲施於是聚徒講學日究心三吳水利其胷中嶽峙磊砢之氣乃一寓之於詩性又好游嘗溯大江西上而皖而贛而楚左彭蠡右洞庭遂陟衡岳讀岫嶁禹碑南入會稽泛桐廬窮天台雁宕諸奇航海達之罟東登泰岱觀日出北出居庸抵宣化大同復歷嵩少伊洛以歸故其詩益雄奇恣肆不可方物往年聞余道蜀中巖壑幽邃嘗欲往游焉而未果余去蜀久亦欲歸不得嗚呼人生山水友朋之樂誠有不能自主者耶莊生曰逃空虛者聞人足音則蹵然而喜京師固冠蓋輻輳之區顧埃壘空集

鮮可與語自吾視之猶空谷也不聞足音久矣頃得君書知及門諸子將以君詩餽諸木使余得朝夕受而讀之又何異於晤言一室而忘聚散離合之迹也耶夫君之詩既得力於山水爲多他日儻踐入蜀之約共君携筇蠟屐徜徉青城峨眉間吟松風而漱澗雪其詩境之清峭巉刻又當何如也壬戌三月畢節路朝鑾謹序

胡序

許君云詩志也在心爲志發言爲詩詩者志之見於外者也有太白之飄逸其詩自然豪放有工部之幽憂其詩自然沈著好爲纖巧者非詩故爲艱深者亦非詩也金君松岑豪傑士也懷有用之才處晦盲否塞之世鬱抑無聊寄之於山水南則看廬山之雲泛桐庭之月登岳陽樓而上祝融北則觀泰山之日飲酌突之泉出居庸關而歷邊牆至於江浙宣歙諸山游蹤時時至焉所以見之於詩者豪放沈着兼而有之豪放者山水之情也沈着者鬱抑之氣也嘗見世之學詩者豪放必摹太白沈着必摹工部日取太白工部之集讀之以求肖嗟夫其志不存其詩何足道縱有一二貌似亦不過與好爲纖巧故爲艱深者同科詩不可以僞爲以東坡之才擬陶且不似況其下者乎松岑之詩不必學李杜亦不必似李杜而豪放沈著同者不在乎詩而在乎境之所處志之所存也民國十一年八月社弟涇縣胡韞玉序





高序

金君松岑奇才也奇於文亦奇於詩而其平生尤以詩自負余亦定爲必傳嘗欲擬一境以狀之則條而爲驚濤駭浪風雨驟至也條而爲雲橫霞舉絢爛彌極也條而爲峰巒矗擁危峻欲絕也條而爲水平天遠夷猶可羨也條而爲垂紳正笏莊嚴難犯也條而爲膩肌醉骨蛾媚多致也其於聲也如崩霆如裂石如萬馬之馳戰場如繁絃之奏腕底其於色也如荼如火如曙光之麗天如長虹之垂海其於神也如龍騰如隼擊如丸之走盤如箭之赴的然皆未之似也若君詩之所似余卒無以狀之蓋以君之才於書無所不窺又益之以遠遊之所得世故之所經宜其窮盡天下之變萬態千奇不可方物如此也歲乙卯余游西湖歸方抱幽憂之疾君忽來書更以近詩見示時君已遍歷魯贛湘楚登泰山朝衡嶽上匡廬傾采石之杯披秦川之樹挹巴陵洞庭之勝覽武漢三鎮之雄余讀其詩未嘗不氣滿大宅也明年訪君於吳門又明年與君同游京師是年冬君復遠道訪余山中越明年又同遊浙東相與泛

桐江謁禹陵入柯巖脩禊於蘭亭而返又三年復同游黃山黃山之大五嶽不能過也自是而君之遊愈廣而其詩亦愈奇余追隨馬首當江山勝槩之處往往有詩然自君詩出余每爲之攔筆而止則君詩之卓絕可知矣嘗謂古之稱壯遊者曰張騫近世之稱壯遊者曰徐霞客然騫與霞客均非善於詩若文也若司馬子長則可謂壯遊而又雄於文矣然亦不聞能以著史奇宕之筆竝移諸詩以傳也至若少陵之於蜀昌黎之於潮子厚之於柳子瞻之於瓊近世若雪海之嵎雅漢槎之秋笈皆以博學高才得江山之助而詩益工然凡此數者類皆爲謫逐孤臣故詩不與境期而適然相遇要非若探奇歷險一資於詩好事如我二人者也惟余之遊跡不如君之多詩亦不逮君遠甚然自謂能深知君而其志又相同者宜莫如余今年秋君壽徵五十余以兒子圭嘗受學於君因命爲刊其詩以壽諸久遠余更略述君詩之不可名及我二人數年來同遊之樂而即爲序其端焉壬戌之秋七月旣望金山高燮



天放樓詩集

谷音集卷上

鳳城春曉曲



吳江金天羽

原名天福

松岑甫撰

金烏蹴起蓬萊曙疏鐘曳斷長安樹星珠磊落雄滿天宿雲如海春綿綿飢龍渴咽  
不成漏曉妝人對橫峯瘦珀露濃濃錦掩花一剪春寒攏雙袖昭陽宮裏遲明暖九  
華殿上東風微早朝人起聽鳴雞雞聲不及馬蹄早月落崑崙天地曉千官立鵲錦  
鳴珂紅見隔山雲嵯峨紫皇昨夜徵新歌綠章奏入通明多諫書欲買千金何

游穹窿詩

戊子

江左山水窟茲峯孕殊異遠矚龍虎形近覲仙靈氣午風吹松篁旭日竄陰翳埋展  
白雲深跌礪紅泉細恭聞翠華來緩試玲瓏轡馳道鑱羊腸荆楚走平易萬山奔馬  
馳尚有來朝意昂首上危亭天空展遙睇

仙人招素手佇我空翠間長風吹羽衣龍駕何翩翩道人昔禮斗結龕荒山巔苦行

出靈蹟宮觀來羣仙警鶴守眞誥暗虎探靈泉一日還丹成蛻委今幾年坐看金井處滅沒生紫烟精神四飛舞靈氣胸中旋太湖背而來驅使列眼前納之雙袖底大笑升青天

山樓何亭亭夜坐對秋月杉檜摩長風寒星撒天闕生烟霽遠岫紙薄不堪熨鐵笛穿雲來萬山坐寥闌林端浮白埃疑是金銀窟淮南古礦師調理入微芴石脈誕靈奇山鬼善藏拙不然狼臙人尋蹤想羅剎萬指搜雲根千斤斲山骨

疲蹤不能息晨登最高峯霞蒸山彩碧日澹湖波紅塵夢積地軸天籟喚羣聾絃琴吐長嘯唏髮迎清風素女掬天漿濕遍青芙蓉片雲渡湖來嘯吸巖氣通頃刻雷電合天半聞鼓鐘莫聲縹渺間矯首青濛濛何當駕長蜺招遊太虛宮不然洞庭君折簡來相從

邱壑窮攀援中懷忽不喜吳越爭戰場滅沒烟雲裏靈巖旣已荒秋高淨如洗霸圖今安在折戟沈沙底人物失英雄江山坐綺靡惟有香涇水滔滔流不已浩歌西風

來但見漁舟起

雲構萬山窟樓閣千餘楹花落碧雲靜藥長名山靈仙人昔對局峯頂開棋枰收子覆空谷盤石生鑄成浩然一長嘯松風吹丁丁下山不識路但問肩樵人

田家新樂府

吾家世以田園爲生所居又僻在江鄉日夕觀農事心焉樂之爲譜樂府以旌三農之勞

秧田歌

秧針刺水綠短短芒種未來正小滿先時浸穀播稻灰七寸秧苗壠頭展桔槔鳴田水盈前村後村布穀聲壠頭移苗水中活分得新秧兩指撥絮襖纏身膝上袴腳浸波心寒到骨雨中各唱分秧歌頭頂簫笠如蓋荷與郎戲水同雙鵝郎種二畝妾種一畝多

鄉農插秧一日之功如此

小姑來餉耕肩頭擔飯籬秧田樂樂如何

水車謠



黃牛戴轆挑兩角六時團團曳車穀田中龜坼須進水木板鱗鱗灌田腹炊烟晚起  
不肯休蘆席爲棚隴頭宿牛蹄走脫東方亮赤日柴門高一丈水多不怕禾苗死更  
聘牛醫治牛創我家夜聞水車響祝爾人牛俱無恙

### 溺泥船

紫荷花開苦菜香柳陰船過趁風涼春畝將鋤待泥壅得新泥壓船重泥中拾取  
蚌與螺船尾蕩酒還唱歌太陽曬曬泥頭白搬向田畦壅菜麥秀陰陰梅雨天割  
麥插禾成水田田中之泥肥且鮮農夫勞力皆金錢溺泥船清明邊

### 稻上場

燕子來未下秧燕子去稻上場

此吳語也

上場打穀雞爭食要去糠粃米脂白糠柴載船

向市賣米價待高來遠客富兒慣放子母錢糶米拔本須今年年貨醃臘不須賣

鄉人

殘年入市購物曰打年貨

天寒先製羊裘穿餘糧回作明年計柴堆稻堆相掩蔽一家婦子話農

桑寒雀飛來噪簷際

詩答沈六

維鐘

吾黨瘦腰善愁士長歌示我中激哀風塵不合備奇住憂患總須才地開但使蛾眉  
天作合未妨猿臂將爲材錦囊烏帽不滿灑孤負眼前黃菊盃

羅星洲

己丑

鳴闌看水長仰見春雲陰鳴榔訪菰蔣棹入湖翠深亭閣滯水氣所欠惟遙岑叢筠  
依瘦石花落清磬音瀾瀾了不喧具有古佛心寺僧淪茗來苦澀不堪斟去上酒仙  
閣秋蛇滿壁淫風帆几面走浩然開素襟漁網掛前浦失却遠樹林抹過半湖雨返  
棹觚稜金戀賞成久囑歸舟意何任

消夏灣懷古

灣頭夜夜聞絲竹湖中鴛鴦不獨宿吳王一聽梧宮秋沙上鴛鴦不並頭並頭蓮花  
秋更卸黛梳月鏡紅欄射西子倚欄愁思深說道蓮心似妾心捧時絕抱難言痛七  
十二峯皆沈吟黃池一去吳王墨錦帆翻作鴟夷宅晚風如夢蕩橫波菱枝慘綠萍

花白灣水如今一樣秋漁歌蕭瑟動清愁鴛鴦已嫁繁華去那得蓮花再並頭

晉口伍員墓

大浪壓山門千秋相國墳長虹屬鏤劍白馬水犀軍鴉陣翻朝日漁榔響暮雲湖民香火社錯喚洞庭君

子夜曲

窄地湘簾風杼織紅燭瞳瞳月死魄美人贈我珊瑚鉤釣起相思一千尺雄劍掛壁澀短芒歸鴉踏花花上窗化爲鬼影窺空堂空堂仰見星斗側漏滴銅壺千萬刻薌蘭一夜青泥濕

快風閣

在廬山湖濱

招提荒垆外川塗勢廻抱曠觀倚崇傑思心出烟表梅雨告初晴湖波增新濤翠漪風葉弱素影雪鷗矯回帆帶鐘聲斜陽背歸鳥僧去寺門荒積蘚無人掃

閩門



花草吳宮代已更坊廂愛說舊時名劍埋寶氣人埋玉花照高樓日照城握算笑看

郎賣絹數錢厭聽女彈箏癡兒那解人間事日向倉橋跨馬行

倉橋洪平康所居也

笏園桃杏海棠盛開桃尤酣艷觴詠連日王父命詩以寫之

花神醉瑤池仙雲謝天眷道春風日嬌琢景池臺眩詩瓢困寒乞素地思采絢脫佩  
暝朝醒東皇急馳傳頰霞起洞府綺縠迎仙媛清尊坐移席佳醞百榼勸文章少年  
時春華爛雲漢蘼葩問誰妬流年暗中換觴詠倘繼夕秉燭遊忘倦

憫農

八月二十四日雨至十月五日止田廬盡淹禾稻生耳自道光己酉以來未  
有之災也嗟我農夫何以卒歲

漏天沈沈雨脚直湖神夜半叩我室曉看湖雲萬片低雪浪蛟鼉翻廣澤今年農夫  
告大有底事秋霖忽淫溢禾稼垂頭根爛死長穗多供雁鴨食水中撈泥作堤埂日  
暮歸來脚腫濕驚蛇入戶魚生竈甕無餘糧爨乏棘我家門巷勢最高水過湖心搗

衣石支離庭菊開數重螃蟹雖肥不忍喫米貴便須禁釀酒歲晚恐難補種麥一雨  
四旬方開霽水土何由分壑宅垂虹橋下波瀾瀾寒菜荒畦試種植嗟爾流亡曷暫  
歸鴉陣西風晚來急

尺溪 六寅

華路東風緊停舟問尺溪雪消春水長花落曉鶯啼野店村醪賤神叢破屋低三朝  
便寒食楊柳滿湖堤

紅蘋曲

紅蘋姓張氏蘇鄉蠡墅農家女賣花來城中值紅巾之亂蘇城陷女爲賊所  
得以計脫夜投宮巷井中死余就試蘇城聞父老道其事哀其貞而無人傳  
也作紅蘋曲以紀實

古井繫長繩轆轤聲最哀有花覆井幹當春不肯開逢人宮巷中抱甕汲井回爲言  
井中史沈沈葬綠苔生何由綠有女荒江曲鴟夷高隱鄉鄉名道來熟二月江南



春蠶豎多遊人陌上菜花開暖風動麴塵女生茅屋底不傷淪賤貧阿父哀駘佗阿  
母齒無齲女手作粬枚隨母餉四鄰皓腕携筠筐布衣穩稱身眉目皎如畫未嘗輕  
笑墮吳中端陽節擔花來入城雙髻如鴉雛鮮鮮紅棉英布履足如霜有花繭作成  
低唱賣花歌其聲如流鶯雖有輕薄兒不敢隨女行行行來大道亭亭見華表朱門  
平日開童僕何悄悄隔簾聞賣花婦女驚起早愛此娟娟多字以紅蘋好紅蘋年十  
六城中往來熟是時天下亂江南大營覆蘇州佳麗地賊來星火速朱門依舊開婦  
女驚啼哭呼船來下鄉換着鄉間服城門復晝扃敗兵棄鼓角中承衣冠殉懸尸在  
廳屋紅巾紛滿眼所至多殺戮女也不得歸棄擔草間伏却過王廢基來就餅師宿  
餅師識阿耶平明送歸家出門逢狂賊道路相邀遮賊也獐虬鬚眼如金蝦蟆絳帕  
而靴刀愛女顏如霞智哉紅蘋女含笑相爾汝謂汝眞英雄奉匣心所許惟彼百年  
好禮在青廬舉明朝百兩來當諧鸞鳳侶若云強暴逼吾力猶能拒賊聞大歡喜烹  
牛宰肥豕走馬邀羣醜逢逢拋大鼓新郎錦繡襖前行蹣蹣舞簫笳聲沸天來叩餅



師戶入門虛無人不知女在所城中索三日乃見井谷鮒古井三尺泉女魂隨非烟  
縋斷不可汲血花生苔錢賊亦向井拜涕下何漣漣可憐小家女不知誦聖賢大義  
炳丹青素月流高天至今宮巷中女魂夜來旋青裙簪高髻顏如玉井蓮吳人倘好  
事祠女爲水仙當汲井華水朝朝供女前我亦採蘋花馨香薦豆籩先作紅蘋曲傳  
之千萬年

題正希先生集後

手搏龍蛇氣未伸高懷寥廓動蒼旻三間社屋雙懸淚萬古綱常一致身直以孫吳  
驅筆墨可憐忠孝是經綸宣尼含笑罷雲泣認此丹心血照人

雪等作

殘雪未融同雲變鍵佇滕六之降臨吳諺謂之雪等伴作雪等伴詩

雪月梅花三白友待雪不來惟飲酒紅爐酒半峭寒生門外雪花大如手眺雪獨上  
吳王臺蹇驢肯得詩囊來乾坤一白鶴飛去冰雪雙清花正開同雲黯黯天無日大

野茫茫雪三尺吳山帶雪不肯消獨立郊原遲行客始知雪亦有同伴六出祥雲佇  
天半水浸荒蘆釣雪灘風敲瘦竹停雲館有時微月逗黃昏顧影梅花悵斷魂天上  
不來青鳥使風前未見縞衣人由來釀雪如釀酒山意蒼寒耐相守耐得冷吟殘醉  
雪霏霏消寒圖上交三九

元鎮寺賞牡丹

辛卯

佛剎例寒窘刊華享眞實東王嘯春姿壇花照叢棘孤庵宅南鄙荒灣流水澀意行  
逐芳草遠見幡竿直諸天墮色相華蓋香雲飾當風仙裾顫迎陽佛眼顯入戶蜂排  
衙花韻方酣逸丹粉窮鉤染盤盂勢傾側僧老諳世法淪薌伴永日梵唄潮音空爐  
烟篆紋結且復拗花歸維摩有丈室

晚行見古塚

野色迷歸騎行逢古墓遮鵲鵲作人語翁仲戴山花棘刺鈎衣澀松根引路斜逢迎  
村犬吠知近野人家

送黃曉麓

裳吉

啓閩兼渡臺習幕

江干柳絲拂錦帆遠行客子披征衫  
勃哥聲裏杏花發問君何事忙圖南  
圖南乃臣無諸國千里隔更水程闊  
金布令甲是家風半刺投人覓生活  
蠻雲瘴雨君所遭鯤身鹿耳嘗波濤  
蛟龍死劫潛臺壁魚鱣生腥大食刀  
游子輟吟慈母喜母竟棄養非兒意  
深悲絕業更無親重踏先人壯遊地  
天下文章幕府工美如孺子豈常窮  
丈人峯畔營新築娘子軍前拜下風

君婦范靜菴工畫亦能詩

帷房弄筆調丹粉青果離交歸畫本圖

成題句遠郵將愼勿遮防費欄楯  
松波綠漲天水寬虎邱塘下泊花船  
南風三日紅鱗至遲我磯頭理釣竿  
離情不若千絲柳深情不若一杯酒  
贈君以詩酌君斗滄江日暮須回首

春晚謠

紅豆花殘鸚鵡泣剪剪細梅怨青實  
東風薄暮緊添寒獨索薰篝理蕭瑟  
瑣窗不見黃月鈎好夢將行畫簾窄  
燈花多事費商量一雙燕子心明白



村居

積水陂塘浴鷺鮮  
牧童斜日渡烏犍  
柳陰巧曬漁家網  
花港長停過客船  
忙裏招朋閑裏醉  
饑來煑飯倦來眠  
村村麥秀櫻桃熟  
愛煞江南四月天

懺愁吟贈內

涼月照空庭影弄紗窗竹  
春風窺我簾藥烟相對綠  
貧病是我鄰愁苦乃卿族  
語卿勿復愁爲卿寫衷曲  
我家門前水潒洄抱清淑  
高吟偕隱詩二水三分屋  
牽蘿小生涯藝花眞眷屬  
而我曝詩書而卿潔水菽  
而我宅尊彝而卿安陋盥  
青山朝畫眉碧泉秋洗目  
小字綴薌蘭年命祝金菊  
如此四十年雖貧亦已足  
卿病何不起起來共商權

往者我婦翁活人千萬計

楊庵先生  
精岐黃術

奇藥破險疾庸症發古義游藝蘇杭間名聲如

潮沸一日登我堂視我挽雙髻賞我應對佳悅我瞻屬麗巾箱啓剪刀寵以葭葦誼  
天不慙斯人早下人間世乍者夢翁來疏髯曳雲帔飲我菖蒲酒飼卿菊花餌卿時

侍在旁談笑大起意如此卿定廖我語當祓禊

我讀離騷經文字皆吉祥卿亦解誦之口齒流芳香爲寫橘頌篇素卷一尺長標以青玉軸皮之黃竹箱沈酣結性命愛玩鐫心腸卿病在病病病乃非古方讀天問一卷琅然起清商

清夜鞠身世不知何代民兔絲生松下尙知三世根芒昧十九載危哉幾隕身天葩茁凜秋吟茁怯孤春吾生本有涯吾心逐無垠安心在心中翩然回智輪心安尙求心得驪龍之鱗感秋秋有魄影花花無痕有無一笑解愁病化爲塵

寶帶橋

長橋寶帶橫輓路此頻經落日明官渡垂楊隱驛亭一帆秋水白七子遠峯青烟水無邊際漁歌入杳冥

蘆墟曉發

一夕蘆中宿凌寒起傍人荒鷄斷客夢高雁唳霜晨碧糯長腰熟紅菱刺角新停舟

傍樵爨三塔酒猶醇

玲瓏曲

花玲瓏媚晚粧月玲瓏照洞房曲玲瓏譜宮商心玲瓏爲文章千絲緘錦巢雙鳳天上梨雲壓春夢生來福薄是多情相思一夜銀河凍

登北寺塔

壬辰

十萬樓臺影分明脚底看隻身凌絕頂孤塔聳雲端大野回春色重城鎖暮寒江山無窮氣高唱拍闌干

姜薄命

詩爲屯村龐氏女作也女嫁凌氏結婚三日而所天亡故作是詩以悲之

二月白杏開有花照粉牆明月出花間媚於新嫁娘朝見新嫁娘暮見新嫁娘一夕罡風摧圓靈化嫋嫋女生非高門門前種綠楊十四能哺蠶十五行採桑十六工繅絲絲成織流黃出門道上行觀者比姬姜皆云好女兒應嫁誰家郎女年二十餘阿



母大奔忙存風理月尺稱身裁衣裳問女嫁阿誰燕燕飛蒲塘蒲塘東去路高樓臨  
道旁蕭鼓何闐闐庭中宰猪羊賓客盛衣冠來上主人堂皆云女福命嫁得東家郎  
香車入門來濟濟多嬈嬈紅羅頭上巾有冠如鳳凰霞佩曳瓊琚明珠墜耳瑤墜人  
天作合玉質而金相青廬撒帳夕觀者舉若狂是夕鴟鴞鳴鳴聲高引吭紅燭大如  
椽蠟淚傾汪汪郎病忽作病體寒如中芒三日不得汗巫醫紛綢謁醫窮佛不靈竟  
乏不死方歌者方在門哭者已在房雖哭亦何知魂歸秦山旁矢誓不獨生與郎同  
存亡幽都閉寒門日月光摧藏鬼伯角鬚鬚縱目多豺狼郎魂倘問關妾行如康莊  
姑嫜來相勸語苦尤斷腸我家門祚單一兒傳蒸嘗又不生女兒有婦勝女強以婦  
當女看爲我理羹湯以婦當兒看爲我司倉箱婦今舍我去何以慰尊嫜婦亦有慈  
母日暮風燭光婚女一朝殉催之上北邙兒魂亦不甯願婦稍徊徨此語感親戚羅  
拜如祈禳哀哀作羈雌戚戚成寒蠶悲風入夜來素幃忽飄颻心知郎來歸驚喜撫  
空牀精靈不可接剗心如中創嫁郎初嬌羞得郎問寒涼三日入郎門繾綣未能長

憶妾許郎家行止媚吉祥鮮鮮角枕邊蓮花雙鴛鴦蓮花開幾時雄雛中天腸憶妾  
許郎家愛學時世粧雙鬢堆鴉雛釵笄燦成行拔釵換著簪麻衣如雪霜昨來雙飛  
燕飛飛繞畫梁晴雨話呢喃襟翅帶花香嗟我素心人修夜獨不暘搥心無與言舉  
首問穹蒼穹蒼不能答怨極淚溷滂怨也亦何益妾命自不臧

### 海軍行樂詞

海天風送鸛鵲羣大漢龍旗掣曉雲新樣頭銜驚海若相公管領水犀軍  
津風筋鼓上春潮高艦輪困比麗譙說到巡洋天盡處仁川東望海程遙  
魚鳳烹龍斫錦鱗留犁撓酒醉香賓將軍夜宴虬髯客毋戰爭雄海國春  
三日風波歷大洋駭傳蛟鱷姓名香樓臺金碧仙山近暫泊春申作故鄉  
乘風破浪是雄圖劍佩鏘洋服麗都博得嬋娟爭獻媚燭花紅處夜呼盧

### 鄧尉探梅 癸巳

春寒醉吳艇翦燭河冰冱梅花無世情荒寂得少趣維山有鄧尉花依鄧尉住寒林



白雲扃雪谷暗香度冰磴搭僧杖苔澗窘樵步處處逢梅花行行屢回顧棹歌朝遂  
發打冰行已暮雪月照蘚葩乾坤返太素髣髴烟林中仙人見翔翥山農花爲田問  
產數梅樹此花宜此山不踏城市屢餐霞飲寒綠冷吟多瘦句山僧誇廟柏四字頓  
銜署清奇古怪四柏險怪軼常理未若花姿嬾三日宿花間掛帆行且駐慎勿拘花歸恐被  
山靈覷

詠司徒廟四柏

文章絕險無宗派盧仝馬異詩狡獪樊宗詩文語詰屈素師顛旭書壯快畫到青籐  
破古法後來揚州生八怪霸氣所鍾人物異諦視但覺筆力邁司徒廟前途四柏山  
鬼亡魂衲子拜蒼龍翠蛟鱗甲舞癯禪古仙衣服敗猛士鬚髯介冑脫風漢猖狂葫  
蘆賣八洞仙人有跛李醉臥街頭癢肥疥佝僂槁枝齊癭醜蜀嚴沈冥孤竹隘謚以  
清奇古怪名三百年來劫未壞薛荔廟荒雜瓦卷臺砌春陰伴苔蒯香葉何來鸞鳳  
宿空山無人自馨欬魯楷秦松尊太祖四柏未免親親殺雖然氣已無餘子拔劍張



弩破天機火急覓句追逋亡否恐山靈索詩債

病三旬矣夢入山寺見曉日倒映峯尖而西嶺月落在脚下白雲潏潏如海四顧無人荒雞一啼聲破山谷神骨皆聳因口占一絕而紅日如奔輪前來失足墮白雲中號而醒汗出如濯疾若失矣內子方侍夜命剔殘燈書之

甲午

愛聽荒雞犯夜鳴混茫開闢最初聲中原大夢何時了獨向蓬萊頂上行

嬌兒夜啼曲

玉繩沈沈天不曙燈花紅驪雙鬢語素羅織作秋江烟錦綳玉嬰啼索乳母坐撫兒  
憎鋤鳴天妥地熨哦詩聲乳鴉墮巢裡窺屋銅儀報時知四更四更月落參橫樹歌  
聲送兒夢中去

感事 乙未

東征虛調萬黃金量見蓬萊水淺深樽俎思縻蕃館使烽烟已逼漢城陰防倭詔勅  
排闥下橫海樓船伴釜沈審敵未精和戰誤九州鑄錯亦何心

大同江上陣雲浮元菟城邊角更愁三島旌旂新照日四陵風雨大防秋豹韜全負  
將軍腹錦被須遮太尉頭十載經營拚一擲蟲沙猿鶴散難收

秦代長城漢代關分明眼底舊河山遷都競獻臨安議據地難爭  
勞盡渡黃金歡喜慶平蠻書生伏闕成何事天聽方高肉食頑

禁中頗牧本奇才修好書成使節還赤手詔扶殘局住蒼頭突起異軍來  
推枰不管棋中劫逃席先傾掌上杯北戒山河自王氣花枝又傍戰場開

### 遊屯村報恩大寺

世事反覆如谷陵大法本自天竺興妖葩劫藥今繁生旃檀林樹腥穢蒸衆生不代  
佛滅度此邦人士少大乘波旬魔王嘯山谷佛力乃向東方行無花果樹植震旦象  
教開譯首摩騰中原亦苦修羅兵雄王雌鷄粉鬥爭豺虎磨牙箭滿眼干戈搶攘能  
哮經茲寺遠數赤烏代成毀百劫無由徵忉利天高不可攝造像殆跨優闔能行春  
士女肅瞻拜奔走吳會輸金繒銅馬西來建章火琳宮又伴天維傾道場隙地四百



畝麥苗菜甲青滿陸靈光古殿半撐拄龍象孱弱颺颺憑承棋盤落鴟吻墮惟有返  
照懸觚稜神燈夜出照石闕陰井鬼汲鼓銅瓶叢竹斷廊碧血色怪杉獨臂纏枯籐  
老僧淨居却完好瓶花妥帖茶烟凝清廚日日飯筍蕨有時鐘鼓聲相磨秋來秔稻  
積齊屋童奴百指躬課耕只苦彌勒不解語夜觀星斗朝雨零河山破碎第宅固神  
鬼慘淡虎豹猶雅利安族亦何有剩餘乞食舍衛城荷擔末法要神力擾擾惟見盤  
中蠅神州會作銅駝陌嗚呼三聖在天安得靈

題汪石泉

錄

費宮人刺虎圖便面

辛巳冬爲先君作

青猊吐火馬踏雲呵鶯叱燕開宮門宮中蠟炬酒波灩虎帳頭顱美人劍銅馬西來  
鬼嘯風景山帝子雙緗紅龍去上天虎生翼狼籍宮花嘯不得柔顏誰把虎心降擎  
杯睥睨髯如戟婢學夫人貴主呼殺機隱隱含青驢佯羞帶媚持虎鬚虎醉未醒首  
已殊帷燈匣劍神鋒快黛色花容入圖畫嗚呼養兵十萬羆虎徒不及宮中一女奴

題管劬安篋窰美人圖



圖於乙亥秋贈先君作也先君學於木瀆管千甫先生先生工於書令子劬  
安則善美人有玉壺曉樓之風後入內庭供奉音信遂絕

菡萏送香秋暑闌  
幙拂微霜冰簟寒  
蕙心玉貌莊嚴觀  
端坐象服衣綃紉  
房中歌成氣吹蘭  
一人對面望  
篴彈旁立窈窕  
鴉青髮巾拂隨  
侍花扶欄縹緗書  
畫几靈檀爐香甌  
茗瓜果盤景泰藍  
磁花葉攢粉定花  
插井蓮丹

吳人呼花  
瓶曰花插

林鐘律叩篋簋完古

銅黝色無垢癡堂前應有竹千竿  
簾衣風颭生虛瀾美人如花碧雲  
端常儀月府宵團團絳脣纖指秀  
雲鬢耳根仙樂鳴鳳鸞杜陵飢客  
風味酸窪驢便面何由看畫師爲  
誰管幼安丹青去作供奉官光景逝  
矣難控搏留此片羽珍琅玕靈巖山  
空閨翠轡列屋閉置三嬋媚花穠  
葉膩朝忘餐琢詩未免嘲輓聲

登金山寺塔 丙申

天風長日語流鈴  
陵谷興亡檻外經  
脚底祥雲遮佛刹  
江干春水上漁汀  
海門東望洪濤紫  
建業西來疊巘青  
搔首詩成天地窄  
高歌恐有老龍聽

京口渡江

江介花初發衝寒試客衫東風渡揚子細雨濕春帆天壓高梳重山空破廟嵌江豚  
休跋浪知爾不能饒

金陵懷古

金川門外柳絲長江抱城樓瞰夕陽百道風帆下荆楚千年畫棟失齊梁景陽井甃  
苔紋古天璽碑殘墨瀋香聞說海棠天下最願乘蹇衛訪清涼

臺城風急紙鳶飛水漲秦淮綠正肥燈上湖樓看畫舫車過窮巷識烏衣西州悵悵  
吟華屋北極登臨弄翠微莫道偏安江左慣昇州還作帝王畿

龍虎江山感廢興九朝衰史莽難勝騶騶日暮來京口薺麥春花上孝陵天險由來  
誤人國地靈從古產高僧讀書種子今安在木末亭荒試一登

雞鳴山頂塌浮屠十廟功臣俎豆無一自洪楊開劫運再令湘楚建雄圖英雄力盡  
孤城在竹帛動留萬骨枯遺像不登麟閣去鬚眉淵映莫愁湖



贈袁哲郎或洛

袁郎十八健作詩宮體恰到娟妙時昭明閣上三年住平生師友蕭德施家居園林  
不近市文墨烟雲富驅使天生俠骨復多情盈庭徧種相思子相思結子春已深我  
有幽怨誰能尋紅妝寶劍雙知首傷纔結舌不能語惟有袁郎知我心三日不見飢  
與渴一見君如見秋月詞鋒白石髓畫洗黃筌骨狂便吹簫悲學佛肯學貧兒賣文  
活蛾眉世少臙脂多君有清才奈若何

和陳佩忍鈔葉璠章疏香閣詩集竟題後

妙蓮花不駐芳年此是生從離垢天一脆琉璃完小劫獨留珠玉滿生前未知月硯  
歸何處難得疏香說後賢從此買芸勤辟蠹分明無字不神仙

原作

不有爰郎金石交都將錦什等閒拋美人迢迢入仙去遺集落落憑手鈔春色全  
收眉子硯秋風驚破鳳凰巢獨憐一入窮儒篋剩與清宵對月梢

予從袁成洛處  
暇得此集與奉



時一門方盛母沈氏姊妹俱能  
詩瓊章孀嫁而卒時萬歷二年十月也

閱汾湖小識知瓊章墓在湖濱大富圩寶生庵後榛菅莫辦表碣全無爰成一

律以告燕尾月舫和佩忍

月舫即哲郎余  
自號燕尾生

寒食櫻桃歲幾更深深埋玉不埋名空王律得美人住寶月猶如絕代生碧漢去知  
瑤怨滅玉魚愁想土花盈新碑欲寫春鯨句幾度商量未勒成

原作

歎息芳華却易消獨留香塚已蕭條舌根自是妙蓮化杯酒誰爲黃土澆縱說  
青禽返蓬島須知玉骨自瑤瑤文章能手燕尾生憐才客荆月應繫吳山禁採樵

展嚴孺人遺影補題

孺人名秀芳甲午六月十一日去世  
年二十三蓋歸予者五年八月有奇

留得驚鴻一瞥姿玉釵敲竹倚欄時畫眉筆擲紗窗外長出瀟湘第幾枝

研帕金環不再溫五年心力種愁根去來較勝梅花月不着湘簾一點痕

悼亡詩十  
絕語悲情

至遺失不可記矣留此二絕讀  
者以爲夷視雖觀非知音也

任氏退思園追悼味根

傳易

重到名園問舊遊，倚欄心事話從頭。  
方塘不作鴛鴦夢，霜醉芙蓉過一秋。  
承塵狼藉燕泥香，鄰笛吹來正斷腸。  
聞道南雲更蕭索，板橋流水自斜陽。

南雲草堂  
在西珠圩

君叔友濂先生讀  
詩處今更荒蕪矣

大風吹倒奇疆石，冷雨零殘躑躅花。  
苦憶櫻鞋團扇日，水香亭子演琵琶。

題胡三橋明皇催花圖

柳乍生，桃花含苞開。元天子，拓黃袍。  
宮桃苑柳春光爛，天寶宮中節物換。  
由來宵旰匪久長，何用吹律回春陽。  
銅丸擣鼓，樺花帽富貴風流此擅場。  
三搥未已，花齊吐人天共醉霓裳舞。  
詎知一夕妬花風，冷紅斷送漁陽鼓。  
月圓花落相循環，回首雅頌開元難。

天放樓詩集

谷音集卷中

吳江金天羽松岑甫撰

古史宮詞

丁酉

軒轅文治日中天雲錦絲綸製袞年帝降華蠶人飼育碧桑栽滿掖庭前  
坤靈翊聖體莊嚴慘淡西陵景不淹昨夜上皇金冊下六宮粉黛話無鹽  
瑤光穿破月玲瓏湯沐分符若水東正是杜鵑紅勝地錦綳安穩誕英雄  
薰風臺閣譜雲韶帝子花開姊妹嬌歲歲巡方隨豹尾坐觀羣后隔簾朝  
玉帛螽山一締婚行宮帳殿暫承恩待看王會重開日天母儀容萬國尊  
佚女生成作帝妃高禔祠下叩仙機宮花爛漫春如醉紫殿無人一燕飛  
郊谷荒寒草不青桃花名馬伴長征故關烽火非兒事並轡看山緩緩行  
大邦天妹姓名香鐘鼓河山樂正長奏到房中安世曲岐山鳴鳳叶歸昌  
將種生傳尙父師椒房恩寵未嫌私不知花燭青宮夕可有弓刀夾侍兒



昭回雲漢下西清說道官家夢未醒永巷撒筭先待罪悟君掩淚是聰明

### 春秋宮詞

分藩魯宋並山河生女天傳吉語多喜得君侯親却扇笑攜仙掌認兜羅  
淇流碧玉繞宮牆素奈花開永斷腸歸妹不來春易老雙雙燕子送斜陽  
金殿從容夜舉杯論兵昨見燭花催數言勘破王心蕩兒女英雄僅此才  
臺榭秋高璧月明牽牛花放魯侯城宮紗半臂宵來薄漫說當年割臂盟  
君恩如海海難填惱亂春心是管絃謚作桃花緣命薄細腰宮裏懺流年  
增鄉安穩醉流霞醉裏扶君上玉驕一劍將恩愛斷臨淄城外有天涯  
秦雲生翦美人衣仙眷風流世所稀一夜簫聲吹不絕身騎紅鳳上天飛  
三日承歡得侍君秋衾銅輦夢溫存千金若得詞人賦說道南威未報恩  
宴朝花影過欄干論道三公禮數寬禁得嬋娟掩口笑相公枉戴進賢冠  
花奴羯鼓打春雷楊柳青旂小隊迴本是宮中行樂地球場假作戰場開

忍淚和親劇可憐。送將嬌小上吳船。千秋齊女門前路。垂柳西風咽暮蟬。  
歌舞青山日半銜。西施新脫浣紗衫。蓮花處處能消夏。偏是香湮號錦帆。

將赴江陰王俊紳

錫晉

以鸞鸞芙蓉畫扇贈別。吉祥風雅因成二絕。題於花葉

之次

生是清秋冷艷姿。向陽無分拙逢時。等閒拋却芙蓉去。冷着溪頭白鸞鸞。  
入懷明月感多情。慙對芳華愧此行。不負水鄉諸伴約。十年吾已白鷗盟。

江陰尋閻典史祠

爵秩勸忠孝。降臣多大官。山河壯天險。雄兵挫彈丸。典史守暨陽。不戴輿朝冠。彎弓  
死名王。叱咤老據鞍。苦鬥八旬餘。力盡大節完。憫忠愛其死。廟食留江干。江流逝不  
息。客愁來無端。豐草鎖林扉。神鴉詔晚寒。靈爽不可即。惻惻淒我肝。會當濡大筆。豐  
碑建桓桓。

暨陽秋感

戊戌

一鋪蜂房百喟生西風獵獵捲孤城秋雲巧逐炎涼變塵夢蠲隨筆札清客燕喜聞  
新棟換痴蟲戀着舊牆行漫山桃李當庭標幾中新材幾中程

長劍崆峒倚十年切雲冠上見青天年光水逝休驚骨豪俊雲來各比肩鸚鵡心經  
圓小劫驂騑生氣出窮邊回頭人海經年住賣賦何曾算一錢

橫議書成裂幾回論兵又到燭花催茫茫宇宙逢今日落落山河數異才屋外梯鈴  
殘月墮江邊鼓角怒潮來鯽魚價長河脈賤此意分明問酒杯

桂蠹霜寒天已秋芙蓉花發滿江洲閨中書有加餐字海上風聞失地愁鴟鵂一聲  
芳草變雁鴻三日稻梁謀竭來步上君山脊徧地江湖奈濁流

### 政變

上林風急雁驚秋影事天家說總愁帝病禱祠遣蒙殺佛慈衣鉢靳羅喉北軍產祿  
兵堅握東市膺滂血辦流想見信宮謀議泄武靈槁臥困沙邱

革新無計禍成胎造就甘陵數黨魁執法似於秦俗忤賈書難免漢庭猜君臣水乳



中興業王霸雌雄命世才千載一逢羅刹帝龍行虎步上強臺

歲暮紀行

朝發潯墅關暮宿望亭驛客子何爲暮行役浩蕩江湖看風色夜航曉輒估帆停漁  
火星星水程黑短柳髣髴叢蒿低大好孤鴻泊浮宅高堂此刻應未眠燈暗機停鼠  
將出魂棲旅枕不得歸冰漸折舷榜相憂孤亭吹角寒鴉起短堠停更曉星直西風  
一夜吹倒人只恐前途腹堅澤

櫓鴉軋軋雞喔咿霜欺蓬背寒入肌推蓬啓窗迎翠微穿林出罅陽烏逗乾腥坤膩  
風刮垢深山大澤龍蛇瘦我欲探珠玊其脰好友王郎東海歸方冬蟄影來窮扉珊  
竿不付釣人手雖有不龜之藥何能爲歸來訂作十日飲消寒詩句爭先題趨程前  
去勿復道凍莖已破鄰牆西

蓉湖之水清以淪客夜叩門呼主人狐裘蒙茸朔風厲上堂先拂衣裾席別來憂患  
百不說却岸孤幘論詩文此邦文物夙雋上我心儀者顧

祖禹

與秦庸齋風骨近未

沐羨子兄弟矯絕倫  
嚙嚙雁行雙立玉座間  
黃子肝膽淳子爵名漢陂不游負岑

約約遊山以爲子罄酌壺頭春  
春回臘轉花事闌  
行當邀過閩門斗柄插屋星

賤賤獨冒風雪歸湖濱  
過無錫訪蔡文森文森兄處

九里十三灣灣水奇潤  
蛾編萬斛膠不行  
喉茹大鯁腹中毒稅師絕歎雙眉愁坐

食無釐向誰權江波不肯送  
潮來到眼久絕漪漪綠陡壁斜坡一縷高舍舟可以車

登陸上坡挽拽下坡愁  
閑閑歷塊防脫輻俯視衆艘戢戢  
檣眼蠶是雁移家避人宿

趁墟入市辦過冬間向坡梢  
構茅屋我非利祿曷至此腸共車輪轉  
單穀西風吹來

墮五指面垢淚熒失冠玉  
嗚呼客游如此曷不歸歸來正噉黃雞粥  
過青陽鎮水乾

里十七

### 石湖泛舟已亥

清遊愛湖舫湖上春篷欹  
三月桃花渡綠暖鷗波肥  
我來新雨過蕩槳紆青隄芳樹

襲錦繡浮漚散珠璣陰嶺  
露尚沐陽崖日初晞美人  
春鬢俯鏡披雲衣萬態酣一



噶菴禱無端倪吳山天下秀佳者如衡疑緬彼石湖仙風流無與幾文藻被山川結  
此長林霏蘼蕪一尺長掩覆別墅基披叢迸古淚酌冷澄詩脾擊楫誓高蹈聞者雙  
鳬驚

習騎至青陽

背却梁溪驛歧途問暨陽桃花開馬首春水上魚梁午陰桑條曲春風麥餅香平生  
門豪橫沾汗紫游韉

閶門酒樓題壁

旖旎江山地登樓醉此觴春風吹茂苑馳道綰金闌萬井桃花色全城酒甕香楞伽  
青不語天末有斜陽

中夏大雨連日不休因憶同俊卿治民游任氏園有作柬俊卿

盲風怪雨足三日修竹萬竿搖我窗東龍西龍攫日走簷溜急漲成秋江壞牆角塌  
樹折臂青奴一夕寒凜霜追思觀魚任昉宅荷背萬雨聲琤琮蓮房今倒百億數興



至便欲挈小艤故人近日有詩句莓苔綠到君書幃

治民贈我焦山瘞鶴銘長夏坐雨因題之并謝送酒

江盤峽壯春冥濤水犀漱月石齒高華陽碑鎮焦山窟鶴蛻千齡石留骨霜降水落石鑿缺蔡君拓之喜贈予熨眼如見山隱居松花佳釀腰百壺飲酣亦是澆異書虛堂爛醉洗足臥躡根儼入雲濤區寄聲貞白今何如

秋感卽贈治民時治民館予天放樓

抱書午夢一伸脚醒及高梧已送秋起拭東南滄海淚遠懷西北美人愁蒼葭路阻波橫臆黃葉山空天放眸賴有故人同作達萬千牢落醉還休雨過莓苔一院青打頭矮屋小談經盤殮一日三粗糲文字千家百姓靈慘淡金銀山鬼泣動搖樓閣海龍醒居閒共想神洲局底事雷礮擺未停宇宙風烟不可知及身猶得好文辭羨君攜約不自炫時復往復吟我詩天圖地碣四壁立蛾眉寶劍雙心知心知得君更快意長祝二鳥無差池

飽霜禿盡三千兔排闥蛟龍攫晝陰爲我榜題書磊落知君天付魄深沈饋貧秋菊  
餽糧在傲世孤松骨格森萬一枯枿留結局相期王路共駁駁

### 北固山

開府南徐重名山北固高長江此天暫閱世幾人豪鐘落千山暮神來萬馬號孫劉  
成底事莽莽送寒濤

今日潮生日江南大地秋石帆樓上望隱隱見揚州雲物開千里江淮鎖一漚中原  
豈無事長想奠橫流

### 焦山

我評書法拜南宗鶴瘞銘留水窟封今日江潭試新棹浪吟詩句嚇鼉龍

鼉龍塘在海門庵前

麟見亭有放驪碑

禿柳澄沙浪打渦峭帆風飽掠江過坡陀石磴盤盤上佳處亭前晚景多  
枯木禪堂寶鼎蹲經幢銅鼓伴輪囷權姦只合親珠玉神物由來清淨身

鼎爲京口某公所藏

分宜欲得之某公不與卒以致禍分宜  
敗後歸某公以此鼎爲不祥捐置焦山

沃焦東望海波寬象鼻穿沙峽度難三詔遺民無勢力隱然砥柱障狂瀾

### 登燕子磯

踞足危磯頂茫茫見六朝乾坤雙醉眼霸王一團瓢石氣秋生雨江風午上潮滿懷  
身世感愁對荻蕭蕭

### 挑菜女

鄉村女兒雙鬟蓬手提筠籃田野中吳儂春盤厭腥膩芹波愛碧蒿花紅

江鄉人呼  
紫荷花草

爲蒿花蒿即荷  
字之正開音也

苦菜抽心論擔賣摘向田頭手指快風吹笑語一聲聲女兒評價心

聰明得錢歸去驕同伴更製新衣陌上行

### 牧牛童

二月杏花紅簇簇牧童高歌叩牛角牛行渡橋影在水頭上笠子風吹落日弄短笛  
橫無腔飲牛覓水來蒲塘有時童臥荒陂草繫牛便借楊柳椿阿奴生小無書讀夜



來慣向牛宮宿鄰牛渡溪浮鼻來鞭牛歸去牛相逐

看蠶娘

做天難做四月天做人難做半中年秧要太陽麻要雨看蠶娘子不雨無晴天

以上吳語

我家牆頭桑葉鮮鄰家女兒採桑不用錢採桑歸去餵蠶飽相逢祝汝蠶絲好愛蠶如兒呼蠶寶

蠶寶寶吳儂語也

三起三眠繭頭白同功繭就蠶心巧人家祝我蠶有秋那知

儂家一月不梳頭縑得絲成更織素儂家衣著還粗布

漁家樂

江天如畫雨絲絲漁翁張網行來遲春賣鱸魚秋賣蟹一家行竈船能載亦腳踏船頭醉把江天買櫓枝一聲鳴款乃棹花風起打漁簑鷗尋鷺覓顏醉酡醉時編唱漁家歌年來怪道魚蝦貴縣官亦有漁船稅

筍黨船

赤馬船行八槳快湖州新筍蘇州賣黃泥裏筍出土香筍脹便恐船身敗駛船急走

防人先去聲船行三朝兩頭見吳儂秤筍朝入餐着水又恐筍味變我家種竹多於麻  
園筍終比山筍差筍黨船來心歡喜大家剝筍河邊洗薦筍春盤吾醉矣

### 賣花聲

茶蘼花開四月節玫瑰滿地堆紅雪農家女兒街上賣帶露娟娟風韻絕春困乍蘇  
鶯乍囀捲起蘆簾急相喚三農寸地不肯閒花朵亦把金錢換貴家女兒坐對花生  
香活色朝品茶有脚不踏田間路眼中安識桑與麻

### 新歌

新歌子夜舊曾聽刻却風花見性靈一自山塘沈醉後又添詩句上旗亭

### 弔長興伯荒祠

庚子

吳淞江畔冰漸漸悲來獨弔長興祠斜陽落木怪鴟叫壞牆薜荔寒風吹江山易姓  
苦無色每有完人天挺之長興起兵在江介奮呼直抗熊貔師素巾抹額手操檣烟  
波萬頃行如飛三千兒郎善水戰杳杳江國多旌旗南風不競鼓聲死獨留大節奠

四維荒江俎豆復寂寞斷橋流水神叢低牧童吟嘯踞殿角草深三尺藏狐狸嗚呼  
光復大義久榛莽思之涕下如綆縻

爲唐指萸烟丈

乃亮

題先德立軒郡承秋窗學畫圖及節母王太恭人寒燈畫

荻圖兩首

滄桑倚伏皆天理劫火紅燒六經死昭陵繭紙江州石古往今來例如此風流前輩  
爪泥痕雪燈秋山富驅使畫圖墨妙兩陳迹世間何物能久視龍華劫轉缺補天松  
羔舊種五十年鶯脰湖水門前綠開圖懽懽愁新烟重題諸老各惆悵宗伯風流渺  
難望五嶽塵生海月殘何處真形索圖上君家三世陰德鳴堂構善拓書鑿楹丹青  
歷劫世澤壽又見玉茁孫枝春完寶絹素貽雲祢

秋窗學畫圖久佚股譜經侍郎  
齋莊中正齋集有二絕句因屬陶

火訟石  
重繪

樓風吹燈燈燄颯綻罷寒衣數更紉警牙上口學四聲孤露髻年最多感當年癡倒  
阿母懷苦覓梨栗母傷悲烏皮鏈几槩折足即今夢想何能追遺書忍檢高一尺腹



痛堂前爲捧檄嗚呼繪聲繪影工則能誰貌孤兒此心惻

寒燈畫  
秋圖

和施丈擁百感事原韻

斗大江城莽已秋浮雲西北上高樓孤杆劫痛全輪局漏水羣嬉不繫舟  
挂笏烟嵐青有際挂帆江雨浩難收圯亭壞塔支離客孕此山河兩戒愁  
爐烟黯淡九天香灑洞關山付激昂夢入觚稜渺金爵煖來鋒鏑借銀黃  
前修玉葬深深地大將星垂作作芒國是傷心餘涕淚三年三照菊花黃

聞道昆池劫燼飛憂來常覺好懷稀江淮寇盜占風角遼海文章隱少微  
剩可灌園留淨土不成啼髮弄清暉菱荷摧折波濤迅莫唱江南暮雨霏  
直東消息奈如何羽檄提塘晝夜過祆廟忽傳篝火熾邊城已壞陣雲  
峨燕齊迂怪宗風競催汜驕淫叛象多軍府鍾儀囚豈得敦盤平地化干  
戈邊外風霜草露滋洛陽宮殿問誰知鬼謀曹社非伊夕神降莘墟竟  
福誰孔翠秋翔飛放泊貔貅宵潰羽林師職方圖籍司農冊恐是紅羊  
癘劫時

師行落日薄虞淵大帥勤王孰占先轉轂關津疲餉譚拱辰畿輔杏腥羶鬼雄夜泣  
青燐血海市朝嘯赤地烟賴有新寧真柱石雍容坐鎮靖南天  
西去風陵訪古媧平江回首帝城賒關憑獲鹿增軍壘宮衛牽牛隔海槎在昔燕雲  
忘戰伐即今鄠杜少桑麻悲筵落日風淒緊淚眼愁心對燭花  
大千哀怨屬華胥病雁江湖識老漁涼月千砧敲急節秋空一劍犯孤虛窮途涕淚  
終師阮前輩行藏早問蘼歎息麻鞋奔問客拾遺無補綬縈紆

附原唱

施紹書

庚子八月有事江城鱸鄉亭登樓眺望感懷時事復道出蘇臺歸舟有作八  
首

一葉梧桐墮地秋滄江夜雨我登樓長條獨曳垂虹柳短檣雙橫合路舟萬頃波  
涵晴雪卷三高祠簷野雲收葦鱸偏地招歸隱極目湖烟渺渺愁

秋花莫問桂叢香戎馬關山付激昂北地戰功穹有壘西鄰言責鼓如黃龍爭蛇



門深仇海虎時狼蹲刺背芒毒霧蔽天人盡墨腥聞於野血玄黃  
釣雪灘前白鷺飛五龍橋畔市人稀  
鯨江冷落輪蹄靜雉蝶迴環戍鼓微  
軋軋木棉猶夜作沈沈水閣近  
朝暉移巢勞燕紛如織鳴角烟氛到處霏  
井陘山色近如何馬足車塵六轡過  
三晉風雲森氣象五臺宮殿鬱嵯峨  
鼓行大將旌麾遠留守都城戟衛多  
食祿萬鍾容有媿中原翹首洗兵戈  
落日悲笳夜氣滋前程惘惘莽難知  
安劉蹙錯謀何左救楚申胥哭向誰  
李郭勳名宜再世岳韓志節或成師  
喁喁薄海關心切正是鐙昏月上時  
漫將近事例瀼淵孤注輕於一擲先  
變自大鈞開戰伐妖從人毀敗腥羶蟲  
沙塗地愁新鬼烏革飛灰散暮烟市井  
蕭條歌舞歇秋高北雁望南天  
孰傾鼇柱補靈媧錦繡山河計里賒  
已縱天驕窺牧馬空傳漢使議乘槎  
冠纓星散飄如梗冒絮雲屯亂似麻  
可歎堯階指佞草牆陰化作斷腸花  
八月驚潮撼怒胥自傷蹤跡侶樵漁  
波心藕折牽絲細江上魚沈獲素虛  
目送秋



鴻風瑟瑟身隨化蝶夢蘧蘧迴好趁蒲帆穩菱花縱橫水道紆

呵壁

呵壁詩成學問天傷心難過鼠兒年十關到處傳烽火九廟經時闕豆籩泥馬無情  
來渡主金人有淚不成仙可憐六甲虛纏命空手難徵度厄錢

深宮無賴話禳祥未信鮮卑八部強幾日關門雄地虎早時垆收見夷羊弓彎朱鳥  
窗前月馬踏金鰲背上霜樓閣五雲龍鳳氣換他三月火咸陽

靴尖容易趨神京好時祈年駐列營宮井女沈田六尺瑤池仙去董雙成才人泣涕  
甘斯養朝貴髡鉗付老兵輸爾虬髯紅拂妓儀鸞殿上訂三生

豆粥蕪亭淚未乾兩宮西笑望長安使金人物關心召詛楚文章掩面看國計險拚  
梟一擲軍情密遞蠟雙丸公卿幸脫排牆死留與天家錫劍槩

自題雪獵圖

風頭刀割指頭僵雪壓郊原見獵場不信平生箋禮手臂鷹調馬說尋常

手教黃間帶鹿盧雪花如掌撲貂狐跳梁百輩難收拾更寫陸渾山火圖

補題二十二歲海上釣鰲圖

嘉善張廷輝寫真  
袁丈東臨補圖

當年龍伯大人居蹴踏三山釣六魚絲引虹霓鉤珠月不知香餌復何如  
絕島蒼厓瞰碧流漁衫淡迤竹竿柔寫生寫出忘筌訣笑煞曹唐是水牛  
鯨浪鯢濤漲拍天滄溟流涕尙年年而今袖却屠龍手去釣槎頭縮項鱸

補題一十六歲莊情屈思圖

三曲濠梁貼鏡平襲芳佩紫蓄幽情十年哀樂傷人久不覺觀河面皺生  
芳甸尋春步落花美人薌草滿天涯閒來檢點撐腸字私淑頭銜未署差

自鐫小印  
曰莊騷私

子淑弟

松作龍鱗石瘦奇前塵絹海認迷離芳蘭十萬編爲佩魚子三千會曝髻

鯢溪 辛丑

棹盡鯢溪路樓臺兩岸分柳堤虹割雨花港水停雲橋界魚蝦市城樓燕雀羣春波

太愁絕東去背斜曛

病小瘳題笏園

春老江南燕哺兒  
午窗病起拓琉璃  
一天柳絮誰家笛  
滿地花陰隔院棋  
夢引游仙詩  
自況靜觀齊物論  
相宜瓶笙又報湯  
泉熟莫認颺輪輶  
地維

雜詠

辛夷花開四月初  
梁間燕子雙哺雛  
雛爾腹中飢啾啾  
時對老燕啼雛也  
翼燥能習飛  
老燕逗之相依依  
一夕秋風下庭樹  
分飛自向海南去  
明年小燕亦成家  
不認當時哺雛處

東鄰老農築場圃  
西鄰小兒習商賈  
南鄰公子交俠少  
使盡黃金買歌舞  
天生智力貴  
自養蜂房亦自開  
門戶蜂能作蜜自  
家甜誰信當時釀  
花苦

南山種松柏志欲  
成棟梁桃李當春  
花實成蠹已傷欲  
走長途須要褻欲  
貢明堂非芻糝  
河汾安定一朝生  
中原大事憑人造  
莽鹵下種鹵莽報  
石女無兒焦穀槁



飢來食盡田家桑飽時滿腹經綸藏我思世間蠶最苦吐絲自縛投涓湯人不汝需  
不汝飼以身殉職無乃狂不殉安能被天下海內蒼生無衣裳乃知報養亦有意前  
村簫鼓祠蠶娘

招國魂 下寅

友人包公毅爲是歌余更重作譜以風琴厥聲悲壯首聯發端則仍包君之  
舊

吁嗟美哉神聖國沈沈睡獅東海側妖夢千年醒不得莽莽河流浸山色河源上溯  
崑崙極我祖于焉斬荆棘鬼雄長嘯髯如戟魂兮歸來我祖國

吁嗟美哉神聖國沈沈睡獅東海側寶藏千年富源殖海岸黃金象牙出橘柚蘋婆  
南北實禾黍油油土膏澤偉大先民此血食魂兮歸來我祖國

吁嗟美哉神聖國沈沈睡獅東海側文治武功爛朝日紀功碑字長城刻天馬葡萄  
資西極到今惟有和戎策瓜分慘禍免不得魂兮歸來我祖國

吁嗟美哉神聖國沈沈睡獅東海側連理同胞枝糾結多是黃炎舊血脉相思相愛  
相親暱大難臨頭要分拆何不奮起圖自立魂兮歸來我祖國  
吁嗟美哉神聖國沈沈睡獅東海側世界平和守不得是我國民死綏日十萬頭顱  
供一擲血濺梅花殷紅色古雄若在祭壇結魂兮歸來我祖國

遼東癸卯

紛爭難解玉連環一寸山河門觸蠻雞鹿塞頭兵北至蜻蜒洲畔客南還縱橫方罫  
棋成劫混沌中央帝最頑遼豕正肥人競逐干戈曾有幾時間  
回首扶桑銅柱傾九連城外砲聲聲將軍健飯遺三矢太傅圍棋賭一枰奪我燕支  
爲敵有幾人馬革辦尸橫而今戰事從容拾付與龍門太史評  
殘年風雪咽悲筋臘鼓催人度歲華東帛乘韋勞地主梓宮寢殿望天涯金瘡雨洗  
沙中骨血淚春開劫後花火自隔河人自看巫閭迢遞況全遮

佩忍餉酒以詩報之效其體

高陽酒徒今不作嗚呼吾意真寥落酒腸無酒詩不流澀盡宮徵商羽角

朱梁任以工尺上四化推

得五音順序當爲宮徵商羽角其言制而聲

霜風昨夜吹老林臥聽高樓戰鳴鐸朝來欲煮苦茗啜韓奴

入門聲嘍嘍阮家兄弟不速來踞坐對我氣磅礴陳君愛人善體貼道我至性甘淡  
泊腹萬卷書手一樽醉鄉無由起城郭年來更抱消渴愁不過屠門噉脾臄一朝撥  
鑿勸百壺肺肝槎枒生劍槩盤登老芋魁一尺佐以鹽齏勝海錯是午微陽偶逗暄  
鄰叟開門掃秋籜黃梅花放低著牆苦硬馨清句難琢濃磨斷墨秃吮筆高喚平頭  
縛兩廬期君見詩發粲齒起爾狂言功不薄明當更棹酒船來痛飲爲君煎餠飴



天放樓詩集

谷音集卷下

吳江金天羽松岑甫撰

讀黑奴籲天錄

甲辰

共和旗誌十三邦開出羣奴拍賣場北省販奴南省去密西江畔好斜陽  
短書獨抱困長貧金滿家兒氣壓人傾過半瓶紅墨水賣奴券上血磷彬  
棘地荆天跼踖難偶逢賢主笑開顏烏衣門巷隨人換又到紅河河水灣  
緹綺倉皇夜捉奴猛回螳臂一當車短槍射殺此獠罷抵得林磴砲彈無  
牛馬鞭笞一聽天忠勤老僕葬南烟靈魂交代天公去母利亞神在眼前  
花旗南北戰雲收十萬奴星唱自由輪到黃人今第二鷄欄豚栅也低頭  
讀利俾瑟戰血餘腥記

凱旋門外砲聲聲道上征車續續停門對紅牛轟飲肆有人樓上看軍行  
華樹堡前積雪多大軍新敗莫斯科月圓花小人生日且度今朝安樂窩

珠圓時計亮銀鉞手把叢花媚女郎忽地羽書催上道慙兒強作健兒裝  
四郊多壘陳雲深羣寇如毛不可搨全仗兒郎金獸膊國旗擁護到天心  
刀雨橫飛肉薄前砲聲摧倒肉飛仙血潮點點都成凍刺有情人腦帶鐫  
身爲折臂老新豐病院相思春酒濃萍果花開書又到直教兒女不英雄  
秋高霖雨苦淒淒馬踏屍行復轉泥臣耐敵軍三十萬怒潮狂擁向巴黎  
鼓角旌旗城下盟金冠還上布兒彭八千子弟魂應哭悔把頭顱買太平

讀埃斯蘭情俠傳

奪婚相持又奪嬌頓癡哀怨起相擾諸天大地多情種不爲冰洲凍熱潮  
情魔翻出女魔神難道凶蜚幻是真雪滿山頭人在抱一時窮島瘴花春  
色敵相逢決鬪狂莫云沙叱利難當流人終有刀環日花燭筵前看劍光  
神力天生是偉男衝波浴血了能堪復讎底用含光劍三尺霜鋒截枕函  
求死今將死願酬洞房春色美人頭郎爲勇士生天國苦是沉冥妾女流

無雙死適王仙客一妹去隨李藥師生死去來難擺脫怎教名譽戴情癡

讀秘密使者

新宮夜讌奏笙簧勸破天顏一種光  
禁籙忽傳軍報絕直教飛使渡龍荒  
戰地風雲捷足先尹邢相避又相牽  
衣春驛畔鞭頭銳百劫修成忍辱仙  
東行豺虎窟中來姊妹花枝邂逅開  
疲馬悲嘶人度嶺亞歐天脊起風雷  
錯認佳兒熨眼看可蘭經咒目雙剋  
願睜最後青瞳子一瞬刀光火燄攢  
盲人瞎馬夜驅馳俠義相逢電信師  
又見橫棺冥室慘仁羅塚上插花枝  
浪傳天語闔圍城假使還將真使迎  
帳殿披帷呈秘密裂開雙眼看尸橫

讀八十日環游記

圓球方罨一盤棋賭勝金圓復得妻  
我作夸夫人逐我者番公案太離奇  
人海抽身托浪游駭聞大盜不戈矛  
脚根無線輪蹄換三大名洋四大洲  
象座冰車價絕高金圓六萬購船燒  
千鏐贖得雙鞋出如此生涯亦太豪



及關容易度關難斷送光陰一瞬間只苦旅行新艷伴旱蓮火坑拔將還  
日向西馳我向東癡奴時計會堂鐘一般守着倫敦刻算到贏餘日再中  
摸金何事矚中郎勝利須看最後場八十日程圓滿日豪貴仍擁擺林塘

答友人漢上書

楚天迢遞隔吳天聞道風光勝昔年輪鐵晚收京洛雨布帆秋卸洞庭煙流波尺素  
來江上影事前塵到夢邊夢裏似聞歸棹發及歸應在小春前

都踊歌

人境廬主人有此歌謂日本西京舊俗七月下浣市上兒女懸燈數百靚妝  
爲舞蹈其風俗猶之唐人合生歌其音節則漢人董逃行也因譜其調以爲  
託興云爾

秋風起兮月生波荷荷蜻蜓飛兮池上多荷荷煙梳風織兮舞裙拖荷荷眼波溜兮  
雙頰渦荷荷心有眷兮嬌蹙蛾荷荷睇碧雲兮高挂銀河荷荷郎在海西兮珊瑚交

柯荷荷妾在海東兮斜抱雲和荷荷拏舟欲往兮海有蛟鼉荷荷心靈相許兮流電  
飛梭荷荷常恐嬋媛兮嫁彼囊駝荷荷相彼呼韓之王兮朝鐵馬而夕金戈荷荷妾  
既爲郎憔悴兮思郎作歌荷荷歌詞宛轉兮嵌郎心窩荷荷郎得健婦兮與郎當家  
荷荷郎若不來兮盛年蹉跎荷荷一旦天緣相惜兮風吹女蘿荷荷喜心翻倒兮珠  
淚滂沱荷荷從此恩情甜蜜兮喚郎哥哥荷荷雀兒飛上高枝兮榮如登科荷荷味  
且驅車遂如臯兮射彼頭鵝荷荷歸來飲至兮酌金叵羅荷荷連臂蹋歌兮對舞傚  
傚荷荷拋郎獨宿兮笑彼嫦娥荷荷天長地久爲婚姻兮之死靡他荷荷

無題乙巳

杯如明月劍如虹瑤想瓊愁爛漫中綠耳驍騰虛海外紅顏螭落感秋風花開在渚  
題新怨寶入空山化大雄我是神洲沈瘵客傷心到處便能工  
酒乾杯淺望蓬萊寸恨天長索翦裁雙鬢茶煙慵杜牧一庭梅雨咒方回騰駕鸞鳥  
思迎宓願作鴛鴦別姓崔倚枕思量情誤我護花心重畏輕雷



仙山樓閣近天河仙使來朝絳節多嶸竹霜勻嬌玉鳳舫船夜醉跌黃鵝三危露冷  
銖衣濕九轉丹長火候過天上六龍隨日馭不勞人奮魯陽戈

莊嚴紫府在人間何事多情福總慳織女機工天不管驪龍珠失數將還紅蘇淚點  
應微笑青見眉痕說尙彎玉狗鴻龍休作劇可能容我叩銅環

題萬國演義

洪荒草木有春秋祖鳥哀龍遍地游八十萬年天不曙鈞天開幕舞獼猴  
創世亞當孫悟空翻雲覆雨仗英雄最憐一部唐虞史法曲仙音演未終  
推背圖中埃印亡封神榜上換侯王十洲未了魚龍戲王母蕭蕭鬢已霜  
龍戰玄黃血史青百蟲繙遍大荒經咖啡結子香檳熟想起泉臺柳敬亭  
憲史修成綴白裘扶桑帝女逞風流夢中忽作盧家婦十六生兒字阿侯  
國際風雲劇萬千武裝談笑出當筵格蘭斯頓卑斯麥抵得京華小叫天  
三千餘年老大國二十世紀太平洋紅樓跳舞聊齋夢滿地江湖一宋江



雜感  
丙午

小時心曠朗齊物游逍遙  
卯角識憂患始知生最勞  
苦吟日不休窮源溯詩騷  
有時案兵略拔劍雄兒曹  
弱冠拜史閣左馬相遊遨  
亦復志王伯河汾心所高  
邇來百念灰蹋壁支寂寥  
如龍抱珠暝百怪藏秋毫  
昨夢騎鯨仙邀我驅雲濤  
我生命不猶薄植等蓬蒿  
不到聖處立思與羣魔鏖  
鷲鳥缺大翮暗馬難長號

百家各有用豈謂儒獨尊  
黃老尙柔退爲古英雄人  
孔老不異宗學易探天根  
孫吳篡易秘立術較不純  
至竟古干將殺人爲人珍  
文百季一慘怛上蒼亦久聞  
大亂大才出相傳般爾海外行  
至今疆場上金火兩不情  
草一慘怛上蒼亦久聞大亂大才出相  
需會有因五行各代謝一尅復  
一生終當肅雷電長嘯開蒙屯  
均堂涓滴水龍象十萬頭虛空走野馬  
視之行星球明月將死時火雲磅礴流海王  
一晝夜人間百六秋種姓溯黃炎遠祖桃  
獼猴豈知洪水代更作蠅屯遊盤古與亞  
當本是兄弟儔萬歲一離居相見操戈矛  
已矣復何言痛飲消我愁

鈞天醉夢夢顛倒自千古駟商擁國色奇書斬寒素孔顏窘菽水盜跖肝人脯郊天  
配冒頓鳴鏑手射父金輪醜媼帝王孫啄鸚鵡湯陰志殲敵血濺園中土趙家仁慈  
裔顛連困索虜凶穢鐵木眞聖武謚太祖清淨婆羅門羶臊五印度波蘭分普奧強  
俄司刀俎檀斐亦淪喪哀哀無與語世界憑腕力天演爲之輔造化亦無言委之氣  
與數

我吳建邦國乃自泰伯始隻手開東南端委化文雉後來傳聖學首推言游氏學成  
吾道南至聖爲之喜季札聘中邦彬彬愛詩禮聖也題其墓文采照青史同時佳俠  
輩閭左翩翩起問彼希臘邦人物有如此遺澤到東林慷慨猶競死頭顱換忠孝姦  
魄爲之褫奈何三百年波靡不可止蟲魚蝕老生鸚鵡調名士昔也百鍊剛今爲繞  
指柔無怪什克匿炳燭朝入市狂走雅典城不見一男子

海闊天遼遼歐亞文明交花葉相當對雅頌笙管調昨者成吉斯首赴拿翁招今茲  
華盛頓前來訪帝堯我疑哥倫波前身騫與超梭柏逢孔孟班荆相諧嘲虛梭毒世



人不崇黃餘姚峨峨伊符塔祥雲捧高標  
嚶嚶自由鐘滄溟震寒濤風日太平洋歐  
亞文明交我執惜不化魔難生羣妖微妙  
而圓通斯人其寂寥

我欲隨穆滿崑崙朝仙靈我欲逐老子化胡流沙行  
我欲問張騫乘槎稱客星我欲  
詞徐福樓船去蓬瀛磨牛踏陳迹鯢鵬圖南溟蟻穴封侯王安能了一生終當棄儒  
冠出關請長纓無爲運齋壁旦夕徒營營

咄咄復咄咄憂來不可說三年三病愁清屏到玉骨惟有莽蒼心不畏魍魎奪文幹  
挺天葩心光淬古月恣讀三藏經以意得其訣佛性最有情悲智雙超越神勇大無  
畏寸心救人熱將與震旦衆攜手登天國美人爾何來累我遲成佛

廣遊仙詩

大地山河一鏡險琪花開落萬峯尖上清新建琉璃塔天勝親書十丈緋  
碧霞宮殿敞春寒閃電明燈百寶攢束約羣仙開舞蹈諸天星斗繞闌干  
批霞納奏應宮商樂府新詞協律郎自是人天推絕調變成弄玉拜門牆



洞府清都掩白雲錦賸珍重辟邪薰紫皇近下求書敕採到人間蟹篆文  
銀河細浪織秋煙萬朵紅蓮禮白蓮一自仙家開五市浮槎直到斗牛邊  
收拾瀛洲萬玉塵蔚藍方罨闌星辰只緣一子翻全局賭勝龍王作部民  
當風吳帶束曹衣聖技丹青動紫薇敕許靈山高會上萬梅花底寫真妃  
碧鸞丹鳳戲山椒紫映檳榔綠映蕉天界公園人世樣園風巔上過花朝  
西來廣袖拂天風一飲瓊漿百拜空醉臥崑崙發長嘯桃花如錦海天紅  
下方花影簇金仙韻事人稱美利堅上界何曾足官府共和民憲大羅天  
六韜金版厭縱橫三聖壇場計弭兵我爲平和作天使罡風浩蕩下霓旌  
手持絳節馴青蚪浪作諸天汗漫遊天外採風傳實錄鋒車歷聘萬星球

### 江館

江館苦寂寞陳編作古朋花黃秋媚酒月白夜窺燈島佛詩窮未楊風筆健能會當  
獵原野矯翮賽飛鷹

即事丁未

闌珊燈事逐番停二月江南最欠晴燕子不來新綠少采蘭桃筍過清明

詠蔬

余詩有律令不趁韻不詠物前和施丈孚龕感事八律客見者劫余破例珣琢小言念龐山湖純爲江鄉風味絕品姑賦之限鹽韻

忍飢誦詩書蝦菜江鄉廉屏斥花豬肉雋永誰能兼春水漲湖潯湖波如鏡匱日出  
蕩舟來吳儂手纖纖翠葉連素莖滑指不容拈冒荇千絲繫捲荷雙角尖柔魂水乳  
交膩理冰唾粘龍女夜出嬉釵股宵品簾離波恐消融閃閃陽光暹擷英去老葉饕  
若魚嚼噉廚娘聘新來吾突久不黔雪花破鱸魚佐以春筍甜輕熬玉脂泣復糝烏  
角鹽捧出翡翠羹玉椀精且嚴缸面春酒香儉腹遭攻砭北客羨南京隔河看酒帘  
驛騎千里致難伴冬菰醃河豚非不佳蘊毒生憎嫌鱗魚誇俊味骨多愁難醢鰓蚶  
更瑣細我舌防遭籍苜蓿與蒿蒿寒乞供茅檐品第推純鱸二妙同鰈鰒有如蘊藉



人納交久不厭張翰思秋風秋蕤老蒼藁採摘當及時春浪桃花添

本事雜詠

披髮猖狂號帝麟丹山威鳳蜀鵲身天倫割絕心無絀地獄親來佛最仁文字譏傷  
鸚鵡禰頭顱險贈虎狼秦君知赤棒階前血原是東陽瘦損人

皖公江上角聲愁傳到稽山鏡水頭虎是胭脂人是俠蛛能羅織網能周冤耿耿  
婆春夢風雨淒淒鬼夜謀並世幸逢女廉范湖雲渴葬待千秋

無賴高王失計多子遺人奮魯陽戈占窮箕子明夷卦怨入荆卿易水歌狙中車摧  
當博浪鴻飛弋寡在虞羅老兵得失成何事快意權當試拔河

浪誇海外指星輶開府江南管六朝官向西園諧價得朋來東閣賦詩招山梁文雉  
虞羅賤閹閹河豚腹本驕更笑崢嶸劉子駿途窮曳尾續長貂

打鴨驚鴛惱彈弓一池春水皺春風名花佳種宜天上修竹彈文入眉禁中史修殘  
終結繭頭銜鐫去敢乘驄葡萄亦換涼州郡叵奈將軍術太工



莘塔凌寶杼女士以所繡拈花如來屬題爲書二絕

戊申

分明彈指湧華嚴妙相傳神弱綫添不是虎頭金粟影也應低首拜湘簾  
綿繡迴腸蘊古春閒繙青史幾鍼神君家自有拈花手爲繡如安救國身

詠鷺

輕雲罩湖墅野水明澄潭鷺立矯風姿映帶叢蘆庵物性有高潔譬彼莊與聃素影  
舞青天又疑仙人驂翠玉瘦翹脰絲雨涼飄簫忍飢不近人惟有魚腥甘浴雨窺陂  
塘白蓮開正酣與鷗共忘機靜趣無人諳仙鶴羈樊籠雕梁燕呢喃鷺潔不受緇奇  
服心所就湘纍及嚴陵曠世同一龕會當作春鋤江湖風味參結廬西塞山開門朝  
翠嵐

自繪梅花小軸題句

空山無人月照地夜深鶴叫知天寒藐姑仙子喪天下莫作人間冷蕊看

感懷

王風降黍離宗周道已喪雅音變激楚民勞歌板蕩邦家兆幅裂夷羊圻牧壯出門  
望中原使我心惻愴溫風吹蒿蓬英雄悲古葬擾擾名利人默默走生曠

百戶汲一井安得井泉寬百政須民財而不開財源民窮日無聊黠者起爲官官家  
好威儀腰帶黃金蟠出門車如龍行人夾道觀列屋購金釵販販衣羅紈羣蠹吮天  
祿黎民骨髓乾嗟爾富民侯朝朝彈汝冠令甲日以新不療飢與寒

拔劍出門去誓將赴國仇國仇未曾報軍中且遨遊高冠曳長刀蹀躞馳驂驅行人  
皆辟易意氣橫九州吳姬美如花盈盈當高樓繫馬垂楊邊紅燈醉筵篲一言不相  
合杯酒生戈矛歸來弛甲臥夢中呼國仇

洞庭有嘉橘秋來被吳霜金盤薦丹實來上君子堂堂前羅衆賓雜坐調絲簧酒酣  
繼六博釵弁紛交光主人誠豪賢愛客比鄭莊何不勤晡脩沐浴經籍芳出門交有  
德聲譽騰鸞鳳乃爲夸毗子曰詔行樂方原氏不悅學閔馬知將亡

亡國亦無難猶埃債其族國自有亡理莫恨虎狼毒衣食媮甘好自謂生刺促舍禮



遁法守更自儕狼鹿安得大仁勇強轉天心剝興亡人力造無待鬼神告努力作亡人無奈鬼神哭

登仙謠

靈猿拜月霜兔泣千歲蟠桃花不實頑仙偷眼覷人間大地山河銀漢色銀漢淺淺環瀛洲龍堂寂寞鮫女愁貝闕雲藏月半鈎帳殿沈水香煙浮帷燈風警秋旻曉崑崙山頂銀竹悄素奈無端重瓣開仙家不信安期棗上清玉闕闕紫皇天街掃花昨夜忙神仙絳節排雲闔虎齒戴勝驂鸞風吹笙子晉隨母旁

金陵雜詩已酉

逢人乾笑作鷓鴣三過金陵怕詠詩今日蹇驢尋舊句朝陽門外雨如絲  
紫金山脚綠紅牆異獸排當蹕路長不見昭陵石馬汗靈旗何日降天闔  
禁示繡鐫五國文樵蘇枉說本朝恩碑亭兩座當龍案浪作旗民藁葬墳  
燕雀湖荒草自青大明宮殿想遺型樅花開到宮門內淚眼先看血石亭



南行朱雀認前航，白鷺洲邊瞰大江。  
江上荻蒿千萬束，三山門外進驛綱。  
金絲壤殿尙淵淵，移却宮牆建市廛。  
記取三牌樓下路，未央宮瓦建光塼。  
賽珍高會萬人顛，閃電明燈絳燭天。  
我自將身閒處看，暮鴉飛到鼓樓前。  
水國池臺點綴幽，魚陂千石芰荷秋。  
一划雙槳平如席，錯怪山名喚覆舟。  
清涼山瞰莫愁湖，眺見曾公閣影無。  
忽憶楊風舊詩句，人豪不惜惜人奴。

閣江天容我望人豪不惜惜人奴

楊千里曾公閣句小

### 靈谷寺禮寶誌公塔

仙釋有妙理，真妄在兩遣。  
古德會南朝，繙經想遺典。  
自從靖節後，儒風日淪貶。  
遠公宅廬山，緬想風度簡。  
貞姿華陽陶，高詠雲壑踐。  
三賢味道真，神明日內捷。  
是時初祖來，楞伽宗風闡。  
一言近箭機，嵩高翠微掩。  
誌公獨佯狂，語妙參隱顯。  
顛倒雜謠識，修途導龍勉。  
尼父持隣括，曰古之狂狷。  
委形返真宅，山空無人管。  
市朝紛遷移，千年光景短。  
遺蹤閬山翠，夕照霜楓染。  
我來訪靈谷，芒鞋踏蒼蘚。  
超然神理會，論古心忌褊。

拈詩和松風倚中千佛選

鎮江旅次不寐

一醉京江酒凭欄日向西湖生瓜步闌月上蒜山低笳鼓城闌蕭桅燈舶市齊明朝  
截江去隔宿數鳴鷄

揚州懷古

昔聞揚州全盛日名園畫舫真風流湖山旖旎供醉衍翠華六度巡方遊地勢綰轂

江淮衝臨江胡馬窺徐州騷狗山前血成海

山在西門外

鞭梢北指瘡痍濱海魚鹽富

敵國想見老邊雄諸侯漁洋早年作司理治春楔事紅橋修

北門外三里

巖賈薰陶愛文

士揮金如土招枚鄒盧曾好事繼都轉詩丐畫怪爭來投猩脣熊白賺一啜名材異

石窮雕鏤四橋煙雨八大利

四橋煙雨園之總名也曰虹橋長春橋春波橋蓮花橋今俱在舊稱黃園純廟賜名趣園黃氏以千金購得秘

書言建築之法每造作雖賅博之才不能考其自出見揚州畫舫錄八大叢林爲建隆天寧重寧慧因法淨高曼靜慈福緣二十四景牙牌拙平

山蜀岡本清曠後堂尙祭廬陵歐東峰最高觀音閣過街亭子香煙浮西峰顯應司



徒廟虞初神異工冥搜頑僧勢利馴僧橫商女徹旦琵琶謳夫差營魂更威福大王  
之廟臨邛溝豈知百年人事變我來稅駕登荒邱茱萸灣畔寶塔燼

在揚城南十五里即三叉河

高旻大寺行宮留下河粳稻垂垂熟裏河水漲多漁舟鈔關門前市廛密衝泥驢子

行道周垂楊荒郭自掩映晴雲白塔常夷猶

塔仿京師萬歲山式

御書樓化絳雲去天甯老檜

鳴鷗鷺

天寧高旻皆設行宮

歌吹不是竹西路二分明月空當頭平山結搆尙宏闊隔江山色

青兩畔西園芳圃太寂寞奇峰倒地無人收宛轉橋圯跑突澗

跑突泉觀瀑亭梅花澗花二廳即舊時御

苑在平山堂西今有御碑亭二及天下第五泉井王澍書石

御碑亭角安石榴此邦文物有功德蕭梁帝子文選

樓梁園枚乘賦七發清河董子傳春秋淫哇澄汰見真賞廣陵絕響人間愁摠衣獨  
拜史公墓梅花嶺上心悠悠

### 重至揚州六絕

庚戌

半黃楊柳好棲鳥紅繚花枝綠映燕舊日維揚煙水地清明輸却上河圖  
蜀岡西起壓揚州一度烽煙一度愁數到鶯花真耐劫繁華今古紹迷樓



我到揚州第二回獨乘划子小秦窓平山堂上逢僧話遙指飛雲北固來  
錦帆天子走天涯千里香風殿脚花花自飄零人自換燒痕青上玉鈎斜  
酒帘風動出簷低欲訪名園舊蹟迷行見小橋紅板斷杏花村外鵲哥啼  
畫舫笙歌夜結鄰魚鹽燈火市河濱蓬窗自展楞嚴讀水國春寒月照人

女弟子周冠春

梅

能詩長擘窠書近從雪菴師習繪事爲荷花一幀絕佳師以

### 小詞題其後余更作詩以美之

桃李占春園芙蓉替秋江清波長菡萏下有瀾瀾雙香風吹衣裙知是蓮花邦凌波  
步羅韞玉佩鳴琤琤周生林下風性行如蘭芷藝事更精絕足使儕輩降奮筆爲榜  
書志欲龍文扛英英丈夫氣筆力森矛鏃哦詩琢秀句燈花挑金釭小院荷風來悄  
然足音遶貌出君子花仙人飄旌幢風露夜迢迢銀河斜挂窗置身江海上令我思  
釣鱸棹舟駕湖去玉笛吹高腔

中秋歷游靈巖天平支硎虎邱石湖同行者內人及芳雄得八絕句

行過香溪溪上村  
霸圖銷歇畫圖存  
湖山蒼翠無人管  
仙眷相攜蹋寺門

破禪門對太湖開  
響屨廊空沒草萊  
壞塔久支行殿廢  
夕陽無語下琴臺

靈巖峰背接天平  
萬笏擎天萬壑晴  
更憶胸中萬兵甲  
當年小范有聲名

文正墓在  
偃師此其

祖墓也勿  
以詞害意

峭壁中開一線天  
上方靈雨下方泉  
山川雅近中唐勢  
劉蛻孫樵一比肩

石瀨松湍礪谷深  
觀音巖上刻觀音  
游人競拜輪王殿  
不記當年支道林

楓橋橋下水流東  
臥聽寒山夜寺鐘  
更弔顏楊忠義骨  
山塘來訊賣花翁

五人墓今  
爲花園

海湧高峰劍入潭  
問泉亭子識憨憨  
我來欲說生公法  
頑石多於箔上蠶

畫舫笙歌沸石湖  
上方山下走神巫  
西河若得西門豹  
還我青山好畫圖

### 題雪菴師白描柳絮吟詩閣

夜寒銀釭凍結花  
黃梅蠟帶朝吐葩  
白天破碎瓊芳墮  
美人縞衣捲簾坐  
吟詩語妙  
芬吹蘭湘管未拈  
出手寒冰肌與雪  
相映白不獨絮花  
同一色  
吾師畫筆參新羅  
香



涇廩廊古意多謝家詩句吟毫繪畫禪更在風光外鄧尉雪霽梅魂蘇更作天女散  
花圖

大風雨志災

辛亥

春來雨足溪漲高汀洲萬綠生魚苗暑風菌菰蜻蜒搖夜涼竹屋驚雨跳噓聲昨疑  
風過簫荒谷隱隱雷車遙電光搜窗風驟驕雨勢悍若傾天瓢懷寒白日擁絮袍移  
牀避濕童稚囂重陰壓屋魚龍交銀河跌落星斗漂枝頭十日無鳴蜩井蛙出戲來  
堂均具區一白翻銀濤水勢怒欲吞長橋湖濱百脉叢葑菱建瓴難禦東西茗三江  
噎澀無浪淘防淫溝漱皆徒勞東海鐵颶西山蛟懷襄動欲呼帝堯雨過水田鳴桔  
槔秧鉞未免波心撈有饘可給酒可澆平成之績非吾曹

入秋復風雨災成感賦

海風送潮尋浦入湖雨翻江求海出三江夏漲秋未消早晚風雨成疊湖一潮未退  
一潮至湖洪復挾千山勢山溜直決無與涵平地遂作蛟龍潭古來澤國惟江南頻



年飲食窮洛甘近海棉鹽近湖桑與蠶四野襁褓皆丁男一朝湖決隄防漏江海眞成穀洛鬪江浦便擬分途行拓渠爲復三江舊卽今歲歉蠲民租公私赤立無良圖灑沙日日隨潮長舊時巨浸今菰蘆滄桑轉眼成平陸水無游波終泛壑物理得失相循環壅川容易疏川難不見江神海若推狂瀾司農都水同時歎

王廢基

時移家蘇城  
貨居瀨溪坊

昔日吳王殿

自春秋吳國至元張士誠宮殿皆在此

荒涼似廢屯棲禽垣竹老浴馬井泉渾霜礎凝寒

色煙萸滅燒痕風中萬楊柳想像拂宮門

天放樓詩集

雷音集卷一

吳江金天羽松岑甫撰

金閶行

壬子

高高吳王城六門平日開金閶縮馳道車轂鳴春雷楓橋水濺濺細柳夾道裁軍中  
聞凱歌云白固鎮回梨園奏新腔絲管清且哀此地非軍中何用長銜枚失意廣座  
間刀光迎面來連營一呼嘯勢若風雨催是時金閶城燈火照樓臺狎客正飛觴座  
有金釵陪忽聞嘶騎臨鳴角聲吹遺簪復墮履涕笑如嬰孩城門下金鎖欲遁難  
鑿坏列肆何煌煌善賈倚多財亦有海外商百物儲珍瑰踞戶如催租囊寶盈其懷  
搜索到蓬門不問捲與杯鳴鳴角復鳴角負戴行大達官鼓打嚴更瞳瞳見朝暉趨者  
飽颺去黠者潛行歸明朝大將臨建鼓揚旌麾下馬氣如虹擐甲看子懸我士聽無  
譁告汝軍中規亂者纒首刑我法不可違幸逃軍吏誅去矣無從追反側各自安無  
爲搜根莖賞善而罰淫金錢犒縻縻此意誠難知公然獎盜魁可憐金閶民竈突寒

無灰捐貲贊北征荆棘緣自栽跳身願從軍良民不可爲

春陰命芳雄同作

時移家  
醋庫巷

東風釀微雨院落春已深芳樹含新意着花媚前林林長郊垌遠孤塔聳城陰流鶯  
出修竹門巷無人尋新泥蠟屐響峭寒家醋斟陽曦何時放屋角占鳴禽

辛亥紀事

高高黃鶴古樓頭一夕烽烟起素秋救世天傳降彌勒宰牲人競祭蚩尤五銖復漢  
謠成讖三戶亡秦鬼與謀上堵秋風吟未畢野鷹來惹使君愁

轅門脫幘嘯生風裂碎山河是大功千里金城稚子去一朝青史讓王終債臺高壓  
三軍壘黨論虛張兩石弓地是六朝人五季生兒如此太英雄

新都又鎮蔣山靈天縱梁山百八星少女紅粧懷匕首將軍花頂刺飛翎徙家北去  
龍移窟脩好南來虎繫鈴尙愛留京江上住貔貅萬竈爨烟青

諭蜀人來蜀道西爭墩往事慣重提三刀夢破姜維膽一市燈燃董卓膽新鬼閻羅



工叢咭陳尸埃及共提攜累他漢上徘徊客驚變鬚眉換勃鞞

飲泉人笑不狂狂翻辦多金買選忙鉤黨劇於河北賊女兒愛作尙書郎單于不頂  
威靈佛贊普偏稱刹利王國論虛楊朝政偽可憐夢裏見陶唐

西湖孫園坐雨同佩忍伯升

七日湖上宿輕陰罩池臺前山濛濛雨後山隱隱雷時見北高雲飛上孤山來名園  
傍湖濱軒窗臨水開不見美人影檻檻生綠苔撻船打槳飛晚泊蘆埼隈水風襲衣  
涼湖光浮酒杯徘徊孤山亭香塚生餘哀安得平湖月照見素衣回

天晴步蘇隄

明發心昭曠朝陽麗通津柳浪送鶯語大堤多游人緒風拂衣善淑景含煙新弄姿  
川呈媚睇遠山獻顰湖隄桑葉老在渚繁花春行宮失禁籞東觀圖書陳謁者誰  
子躍馬來城闌峨峨大功坊尸我靖國神湖山自由天漁鳥鷺相親晚來當飲酒去  
采南湖蓴

韜光在靈隱之巔覽江望海下飲壑雷亭亭當飛來峯脇冷泉春涼二亭間

瀑聲震山谷

萬竹夾飛磴四山流泉響我登韜光巔雨過天容敞金輪有逋士緇衣解塵鞅絕頂  
贈佳句千載供撫掌江湖袖底落海日眉頭上龍潭水一甌跌落三千丈飛來峯最  
低石洞仙供養藤蘿牽絆住枉抱凌雲想雪浪破山足敲磕鳴甕鴛當湍搏危亭蹋  
石跨龍象買醉九娘家美人已黃壤呼飲三百杯長歌動遐賞

游龍井度風篁嶺尋烟霞石屋諸洞經理安寺晚至虎跑泉

武林四月山泉涼千山萬山茶樹香泉流竹根鳥鳴谷陰嶺闌閉陽崖張我行先叩  
龍井寺石幢花影風飄颺龍泓水泉隱山曲叢篁老樹跨石梁松枝活火煑石銚瓶  
笙幽咽聞宮商雲腴露蕊粉蠶碧禪榻午夢遽遽長夢行忽度風篁嶺西湖倒景浮  
林光烟霞石屋兩古洞奧衍曠朗各擅場佛狸中原侈佛教造像祈福鐫金堂伏龍  
乾虎楊大眼太妃孫寶王元詳道略五百更精絕佛巖摩厓舉國狂靖康覆社馬渡



江士夫顛顚飯空王千斤萬指病山骨坐令翠壁生疥瘡鬼花獻媚佛含笑士女瞻  
拜誇明粧山回谷轉理安寺高楠巨竹山遁藏碧天無縫青嶂合乾坤一色疑混茫  
老僧曾作宰官夢誕登覺岸憑慈航文士結習未捐棄法書名畫收琳瑯虎跑泉當  
石屋面樵風吹上松柏岡谷泉淅淅響珮玦香茗纂纂裝筠筐東南六泉我品七此  
游風味當難忘山鐘搖暮下坡去雷峯塔掛斜陽黃

冒雨上棲霞訪紫雲洞越嶺至白沙泉遊黃龍金鼓二洞

道書說洞府云是仙人遊仙人好樓居何爲深宅幽我疑太初民穴山如獼猴石斧  
斲蒼壁几榻模型留不然干戈世避地窮山陬全家窟土室如以壑藏舟更當鼎革  
際遺老恥陳疇燉煌石室中種姓悲悠悠南山作棺槨生遺死若休崖崩谷口閉骨  
蛻泥沙揉千載一騁秘好古搜髑髏即今紫雲洞石剝苔文鏤菌蒸氣作惡蛇涎腥  
臊流坎窞深且奧欠伸石打頭苟非天僇人何爲荒谷囚黃龍更草昧金鼓差相侔  
伯有醉壑谷行尸鬼與謀裸葬楊王孫達者愛自由支祈被桎梏離堆鎮石牛我不



入地獄何爲此逗遛鬼趣計亦得真人安可求風雨漫山下飛瀑穿松楸坡蛇像疑  
塚滑屐莓苔稠牛溲徧山谷山靈當見羞傳語選勝客明月休暗投

江干有駕濤別墅倚山瞰江不知誰氏宅也杭俗凡名園勝地叩門即入有看  
竹何須問主人之意

江勢抱城灣丹樓聳翠鬢地連秦望嶺門對富春山水國鱗魚賤榛叢雉子斑駕濤  
名字好此福絕塵寰

### 醉登六和塔

錢塘江上風冷冷吳山越山相對青江湖帶雨晚來急客子倚闌酒未醒沙禽決起  
上高樹遠帆作勢循迴汀高寒獨立何所感耳際但聞風語鈴

### 謁張蒼水墓

瘦馬獨出清波門南屏山色開朝暾哀湍瀉道磴蘚滑捫碣知是蒼水墳蒼水大名  
垂宇宙文山疊山氣節敦論兵侖儻少年事絳衫獨著驚其羣臯亭木落天晝昏錢

塘江上波濤渾關山血淚殉君國化爲朱鳥誰招魂束髮我讀蒼水詩乾坤正氣闔  
目存弼教坊前一灑涕碧血尙留芳草根東南昨起蒼頭軍九原爲報公知聞即今  
酒乾杯動松柏舞天半尙有雲旂屯

七月十六夜彌羅寶閣災

秋高月照吳王城萬家燈火涼如冰赤鳥飛向城頭鳴琳宮蠹天天闕品流火爍爍  
丹鼎升彩霞突出噴窗櫺火聲隱隱如雷霆上燒天關煑列星天龍八部竄帝庭二  
十八宿闖太清玄元皇帝踞竈稜自誇入火不焦如定僧青牛燒尾脫輻衡羣仙亂  
踏天闔行長庚老子翻酒罌或向慈航借淨瓶海水滴滴楊枝生禁敕祝融如律令  
融也掉頭喚不應火勢已著最上層嫦娥月窟開銀屏老兔抱杵夢裡驚紅雲樓閣  
天爲頽火鳳四集張翅翎倉卒命駕逃雲輶下界正撒盂蘭盆阿鼻獄卒夜打更窮  
鬼飽噉豕腹膨鬼門關上懸一燈天崩地塌鏗華鯨化人宮作阿房傾火攻下策功  
竟成雨師卻走雲憑憑紅照滌聖關前亭靈巖上方山不青十里之外牛喘聲全城



人馬如沸羹救火忙煞消防營嗚呼江南伽藍古著稱彌羅閣子享盛名行春善女  
繡幃停高梯石級弓鞋登爐烟篆作寶閣銘幡幢百寶珠瓊環一朝赤餒噓騰騰摧  
陷之力比甲兵可惜畫壁仙有靈海蟾三足跳青冥三層閣上有松江楊芝畫劉海蟾像我欲上書攝  
六丁還我七寶樓臺形銀河斜挂星斗橫青烟突突訴不平浩劫下降天難勝牆角  
夜夜飛秋螢

大風雨渡太湖入西山

癸丑

四山雷隱隱雨勢逼上頭風起伍員廟胥江水倒流我船如激箭劈浪爭蛟虬平生  
犯險心氣欲吞九牛金庭玉柱間夢挾飛仙游怒濤震單舸渺矣均堂舟天吳猶牙  
角伯翳所深仇蹴踏萬銀屋劫我迴淵囚六幅蒲帆欲飄飄水上鷗長年把柁泣窘  
若魚中鉤卻望鼇山嘴霧雨遮兩眸轉向莫釐峰薄暮荒江投風亦不肯止雨亦不  
肯收而我方扣舷笑傲輕陽侯船尾過濁醪飲酣氣益適瞥見石公山玲瓏波上浮  
峨嵋似郭索橫行過沙洲出險始回顧惡浪森戈矛擔擎仗人力不向罔兩求燎衣



無濕薪青泥沒蹠稠健步走林屋前村聽雨鳩

聞冬木老人隱居包山年八十有六擅鄭虔三絕神明不衰今之少微靈光投贈一詩以爲先容且冀得老人之墨瀋也

峭帆帶雨雲冥冥晉口風利船不停浪花怒打船折行對面失卻包山青包山丈人存古型方瞳湛碧涵明星消夏灣頭結草亭清詩妙畫見性靈詩吟左司畫右承山澤之曜壽者徵我今冒雨訪洞庭願得墨妙圖真形

附老人和作

秦敏樹 散之

婪尾花殘雨冥冥山家縹絲聲未停幽人好奇冒雨行烟波窟裏山抹青林屋禹書有典型挈侶曉探見明星老夫伏處射鴨亭登晉久絕牽性靈索米懶作哦松承何幸宵來夢有徵羽衣仙人過洞庭忘年盡許結忘形

包山寺

積雨漫荒谷流瀑響深澗四山濃翠裏一角紅牆現茲寺古福願遠溯蕭梁建寂寞

三百春高詠始皮掾  
菌閣藏深塢差見羣峰面却稱包山名  
韜隱避人隄山門兩經  
幢紫苔侵蝕徧榜書認前朝不是天王殿  
暗泉階下流流出山花舊青梅枝垂實芳  
草鋪如薦可惜毛公壇流潦紛相徧勞生苦卑溽小坐喜清便且共踞僧牀大敞杪  
杷宴

石公山

湖天三面石瓏玲寺裏登峰踏上層  
脚底濤聲春禹穴眼中山色辨吳興  
聯雲嶂險看雲疊來鶴亭空喚鶴磨  
一事難忘花石史萬牛回首下高陵

雨中遊法華寺登後山望湖

梅檀花雨香雲濕祇樹清陰翠蓋張  
自笑平生臂騰手低頭來炷佛前香  
清泉一簞制禪龍五里平岡俯壑松  
吸盡湖波三萬頃胸中七十二芙蓉

消夏灣贈冬木老人

明灣十里菱荷香菰葉搖風翠荇長  
我是垂虹橋畔客者番真到水雲鄉

雲水鷗魚結比鄰五湖風物醉吟身  
倉山寂寞俞樓廢海內風騷剩幾人  
精舍三弓拓紫蘭老吟詩句未闌珊  
英雄鬩煞微塵裏始信南山四皓難

遊大小龍渚石竅玲瓏吐吞濤浪其聲中節爲西山勝處

風水搏連環鈎天水石間龍藏金鼓  
洞人到石鐘山張樂洞庭野扁舟消  
夏灣衆喧  
吾獨靜暮雨瀑潺湲

遊林屋洞水深盈尺不得入

少讀伯翳經遐思洞天錄素書閤不傳  
卅載夢林屋此行訪靈威冒雨蹋山足  
聘妍秘乳泉漱鳴玉地肺通呼吸壬遁  
縮五岳東走瑯琊道西上峨嵋麓  
浮冥行暨南朔洪波鏗大鯨石室耿華  
燭一柱隔仙凡穴竅施棐檠  
潛臥深谷石鼎禹餘糧萬古炊不熟金  
塔剖陳尸貝葉書能  
彌馥軒轅張飲地上有爛斑竹當邀  
龍宮壻來就鴟夷  
淖深泥沒踝臨崖唱獨漉蛙黽生堂  
竈褰裳畏虺蜮洞口雲冥冥無由探  
靈躅我生



未涉險修途躋平陸高穹蓋厚地苦閔人代速磁極勇可探玄境阻難索且復踞洞  
門冷冷聽水樂

夜宿徐州

颺輪碾淮甸一日千里周朝辭金陵關幕作彭城遊彭城苦風沙赤日曬不休山高  
秋氣亢蝗蝻生齒稠回首夏伏交南北操戈矛陳兵戲馬臺投鞭思斷流一挫利國  
驛軍動不得留我來弔新鬼山頂鳴鵙鷖殘月隱孤堞無由見黃樓雞鳴戒徒御笳  
鼓鳴城頭乾坤正秋氣惆悵看吳鉤

曲阜謁少吳陵

馬蹄清泗激流波魯道風塵蹀躞過姬孔不生天地老夕陽高塚聖賢多  
曠野秋高見野鷹書雲臺圯莽妖徵自憐身是窮桑胄獨拜金天少吳陵

曲阜拜 聖人林

佛欲滅度悲天龍仙將換劫雷火攻尼父亦作兩楹奠千聖百王吁道窮古來聖者

有大道苦縣之術離厥衷重華命契敷五教乃教胄子非王公儒門自是有家法於  
宗伯職爲附庸上聖無師師大化羲軒堯舜皆天聰尼父陶鑄帝王術丁甲爐韜光  
熊熊以儒承道履天德文周墜緒歸我躬遇聃一緇柱下史祖契亦號司徒宗姬公  
尙父各聞道陰符秘計開七雄孔老異趣在王霸有如齊魯分東封惟孔至誠貫物  
我贊化自與天人通乾元用九天下治道濟萬古無汗隆春秋經世垂大法太平之  
國華嚴風衰周據亂攘功利安有明德新民功羣龍无首德乃見平歷三世躋大同  
雖然吾道豈在遠大含細入中邊融入孝出弟愛敬始中和位育德自充其間經緯  
在禮樂普天大化胥醇醴三千弟子環講座天下英雄在彀中有王者起來取法牲  
圭北面臨辟離素王如此亦云至金鏘玉振考笙鏞傳說騎箕申降嶽佐命尙爲天  
所鍾五老降庭麟吐瑞書雖齒緯吾猶從天不慙遺假年壽嗟彼羣聖能無恫後來  
薪火傳道脉惟思與孟相繼蹤根仁自是演孔業披豁大義昭羣蒙我今撫衣拜馬  
鬣松柏一徑趨靈宮曲阜當案洙泗繞防山遠眺雲疊重嗚呼道大如天不能容卷



向后土無卑崇金絲壞殿淵淵響羹牆琴夢如相逢安得茅薤肆鄉射彈琴嘯歌開心胸精探六藝見道本豈畏著書窮愁終

赴鄒縣謁孟林誤投孟母林因賦一律

孟子孟母二林去曲阜各二十五里

誕德芬流演孔圖

春秋演孔圖孟子生時母夢神人乘雲自泰山來止於闕

宮牆影裏識今吾西周任姒三賢母

東魯曾思四大儒五鼎蒸嘗感風木七篇詩禮道江湖單車歧路瞻林下中壘書存懿範徂

登泰山自馬道口先訪經石峪經刻在斜坡上凡九百六十字

羸火燔六藉孔壁埋皇墳聖尼去不反流傳喪道真考訂隆漢儒今古滋紛綸曲學妄賦竄大道無完淳熹平思振古刻石太學門兵戈復喪亂馬矢邱陵屯象教走中原山川氣一振雲構萬峯巔仰首千由旬魔高道益高虛空轉法輪往往取聖言鑱之翠壁根陰囂雷火避陽崖光景新非獨顯神力其書邁羣倫昔聞經石峪今來踏澗濱下馬渡雙澗龍象坡陀蹲坡斜一尺高瀑流浩無垠水樂梵唄奏耳根清俗塵



鴻都聚僧荒園橋虛無人空山有釋帝吾道其荆榛

雲步橋題石壁

架橋絕壑上高步青雲端其上瞰危亭其下鳴飛湍湍驚萬丈落仰見紅欄干倚欄  
望前山夾谷松吹寒仙人渺何許徑欲翔龍鸞寧雲歸去來我實衣裳寬

對松山

秦松蛻骨爲龍去生子猶龍襲封樹子復生孫滿山谷奮角張髯有龍趣隔山遙望  
翠冥冥松幄高張雲作屏天半濤生奏仙樂海風嶽雨吹酒醒山間合有對松亭

泰山絕頂

不到絕頂處安知泰岱尊羸劉封禪去徐究職方存日照玲瓏觀天開詆蕩門莫云  
小天下西北有崑崙  
長白東來勢羣峰意態驕風雲千里會冠帶百靈朝汶水環前殿明河摘九霄排闥  
應不遠便欲控扶搖

題碧霞玄君祠

金鋪琳宇化人宮  
天半靈旗窈窕風  
五嶽真形圖笈笥  
八璈仙曲闔房櫺  
祠依泰壹東  
皇貴秩比觀音  
南海崇帝女  
天孫隆譔牒  
荒唐神怪演齊東

黑龍潭

泰山盾寸雲觸漫石宇  
山困淪澗谷底潛龍臥  
雲竇雲嬾恥爲霖  
封谷如閉螭龍亦  
困久豢奄奄飢且瘦  
坐令齊魯郊焦死  
南山豆大汶澗見底堂  
堂車馬驟東風  
日夜吹黃沙  
中人癡我來看飛瀑  
但見涓涓溜鬼斧  
劈焦崖石壁化雲皺  
芒鞋踏礮過亂石  
牛羊遘童山照赤日  
沈沈厭清晝  
何當鑿礮開  
解脫禁龍咒  
百道甘泉飛  
天半癡雷吼

歸途駐車臨淮關

振古鍾離地  
停車問戰場  
長淮來穎壽  
天險控濠梁  
問道馳京口  
孤城蔽歷陽  
耕屯資富殖  
愼莫構機槍

過滁州

北行厭塵土喜見滁州山翠嶂城三面蘆花水一灣東渠瓦梁堰西險清流關又放  
颿輪過秋空夕照殷

寄懷洞庭冬木老人

榮利損天機涉世無大年山林葆真性巢許多彭錢自我游包山得聞夫子賢撫衣  
拜靈光龐眉雪盈顛飲我酒百觥和我詩三篇別後賜璫札素壁開雲烟使我夢魂  
勞飛來九洞天南風蒸殺氣盛夏鬪鷹鷂洪波震恬鱗驚禽枝不安寤寐枕兵甲無  
地容桃源夫子獨高臥湖山訂醉緣仙凡兩隔絕思之心悄然歲暮苦懷人賦詩達  
拳拳詩成湖已凍梅花開上元

寄懷廖季平先生成都

大道寂不語聖者天喙鳴詩禮閼孤塚發之賢愚驚天壤着百家虛空綴繁星東魯  
卓日觀燄燄光天庭尊孔攬羣賢鉅細包六經絕學樹堅壘高座闢大乘四變達位



育泛濫窮滄溟巴蜀挺此豪十載想儀型一朝得捧手挈之東魯行巖巖訪岱宗大河當前橫栖栖滯闕里接席多豪英經筵推祭酒胡牀獅子憑翻轉大千案舌辯波瀾生聽者三日聾奔走如中醒曰通天教主海外馳聲名孔教大會德人自青島來觀窮秋動歸思驅車下彭城諸生遮不留惆悵難爲情徐下邳劉靜幾仁航在過江暫別去風笛吹徐邀先生稍留不允離亭十日書復來書來告行程巴船整帆索布被秋風輕蜀道青天難我老惜頽齡及此重握手他生再合并奉命走滬江江上寒潮聲寒潮送君去漢臯駐行旌尙復記阿蒙書來話生平仲冬天雨霜上水過夷陵定知瞿塘峽水縮石凌兢峨峨錦官城門生當郊迎夜觴跋燭淚秋子敲棋枰禮堂寫述作下帷筆不停蜀漢車軌同西行當擔簦來上夫子堂清酒假三升奮髯抵王霸脫屣輕公卿青城峨眉秀撰杖吾猶能

寄懷毛仲可何泰安

岱宗青來寒戶牖主人留客觴重九山左黃花取次開銀槎一醉桑落酒酒罷客行

月在樹徒御張燈送車右別來百日三寄書開緘令我重回首投轄已感交誼真贈  
碑具見相知厚清琴泛響聲在耳楸枰落子談用手遊山行厨供張備騶徒廟祝知  
名久先公領此百里郡道路爭稱賢太守即我假館僅三宿一門詩禮敦孝友江介  
花開春意動問君肯上吳船否不材誼作東道主羈矢前驅屬車後蹇驢扶醉訪獅  
林畫舫載花經虎阜可惜江山平遠不驚人比較齊大非吾耦

寄懷黃劍秋

昭謬 蘭州

江南浪子美少年東行渡海北至燕西行渡隴登隴巔去時行李不滿肩賦詩別我  
閭亭前京華觸熱病即痊入關九月衣裝絳到今江南雪滿天隴上寄書訴無錢飢  
來驅人真可憐回憶酒樓初擊鮮自誇豪飲駕昔賢封侯願得封酒泉吳姬如花嬌  
當筵水調新詞譜管絃前身合是柳屯田一朝遠宦如左遷臯蘭之山像祈連黃河  
北打山根堅河源落日山蒼然秦雲隴樹路萬千驛使匝月通一箋高堂倚闥望眼  
穿樓頭思婦悄不眠隴山鸚鵡巧能言相思好借靈禽宣相思紅豆珍珠圓銜子南



來好語傳我詩寄君心  
惜惜嗚呼黃子美少年

程生星恆

勁

歲暮赴歸綏走筆送之

遼絕左雲北胡爲君獨行關  
山方積雪書劍去長征  
插漢馴藩衛呼韓失舅甥  
巖疆一改置擘畫仗書生

窗前玉蘭爲風雨所敗

甲寅

二月春風香爛漫瓊葩吐  
賃廡城南巷與花作賓主  
大塊文章在雲物書空筆花勢  
飛舞素艷朝光媚紫房  
甘露消藐姑神人雪作肌  
霓裳仙子月爲府清虛上界  
不少駐謫向紅塵亦何苦  
夜聞風雨打窗急枕上愁心  
爲花劇朝來却見壞色衣  
玉立亭亭損標格看花尙有  
棠與梨格高難並頭爲低東  
皇不矜貴微雨宵成泥花開  
總是愁花落勸汝黃鶯莫浪啼

夜乘江新船出吳淞口

風熟潮回夜四更  
萬人枕上轆轤聲  
江船載夢不知重  
行到海門天未明



蕪湖舟中寄天遂

一自酒壚別風波意灑然旌旗夾古戍桑柘暖平川  
牛渚磯頭月鳩茲江上船問君  
草橋柳幾日嘒鳴蟬

小孤山俗號小姑娘戲成六絕

馬當風利峭帆輕江上微波脈脈情纔向螭姬祠畔過雲中又見小姑娘迎  
蘿帶雲衣綽約眉黛梳瑤鏡碧瀾鋪平生愛煞津亭吏日日江頭看小姑  
西蜀東吳萬里船長年三老慣風餐逢人盡道江湖樂行到姑山仰面看  
絕代風姿古代粧小姑娘居處尙無郎大姑年事差長大嫁得鄱陽水國王  
海雲東望起樓臺潮到姑山卻便回我說潮神忙底事只應貪看小姑娘來  
此去潯陽江上舟舟行十里尙回頭吳兒已化心腸鐵妒婦津前避石尤

潯陽琵琶亭題壁

青衫有淚爲神洲王粲辭家賦遠遊夢聽琵琶醒聽雨江山如此四絃秋

廬山吟

我愛青蓮詩高詠廬山謠今朝上廬山青蓮花高標一峯一蓮瓣千瓣如花苞花中  
結蓮臺漢陽峯峇巖我行亂峯間連天響松濤白雲起脚底風來吹竟消未熟羊胛  
許蓬蓬挂林梢峯多積長陰路轉登陟勞雲天瀉風瀑滿耳錢塘潮此地富靈秘驂  
鸞多松喬鑿翠架紅樓誰使虬髯驕舐鼎想飛升癡肥骨不高嶺以牯牛名無乃仙  
靈嘲風景在山陽湖波光動搖我來走陰谷取近虎溪橋午聞東林鐘雞鳴在山椒  
志欲結蓮社苦無方外交終當了塵願長作廬山樵

石門

此身一落山水間眼中之山高插天看雲似比看山好慢天席地兜羅繇蒼莽又似  
少結搆移向壑谷纔能妍廬山石門天下絕雲滿山腔山迸裂萬竹倒生天永晦澗  
谷遶回石橫截蛇行禹步度石罅脚底風湍滾飛雪雪濺湍流出谷行仰見雲中雙  
闕青天紳跌落不復管據石坐看山陰晴拖青紫白日變化偶在隙處觀愈明梵唄



風來竹林寺鐵船之山當面橫三百年前絕壁上架空飛閣鑱青冥

徐霞客游記門內對峯倚壁都

結層樓危闌微入鄒昌畢貫之新建精廬潛容成焚修其間

昂頭天外攬勝蹟推窗回瞰潯陽城到今簾蘿攀盡

折頭風過雨山花零暝吟有句不能寫且聽欄泉琴筑聲

### 入天泉洞遂登游仙石

高高佛手巖下有天泉洞雨過天泉發滲入石屋縫屋口大筋張又若側破甕苔花  
滑兩屐五月猶凝凍老佛疲津梁仰屋苦石重終古雲埋山放眼四無空偶然風吹  
來乾坤醒大夢北訪遊仙石削壁步難縱其上青冥摩厓字拳鳳其下森戈戟武  
庫恣盜弄對面亦絕險恨無仙人鞚雲來裹我身耳目陡昏翳脚底石搖搖寸地數  
子共轉身墮坑谷靈魂向天狎苟無山賊膽當作老韓慟天步亦艱難歷險吾何恐  
尋天池寺寺已廢衲子金鉢疊石爲屋熏修其中與之言識西來大意示我一  
偈曰苦行經年住破山貧僧自閒雲自閒昨夜風來雲散去到底還是貧僧  
閒已復導游文殊臺長吟遠眺因賦詩贈之



登山度絕險一峯復一峯撥雲尋古刹一重復一重匡廬之山九十有九寺千巖百  
谷酣笙鐘到今尺椽片瓦不復見狐兔出沒榛菅叢浮雲變滅時世換惟有青山如  
舊客我訪天池寺直上文殊臺鐵船之峯可飛鳥匡湖洋洋如酒盃長江帶遠天浩  
浩清風來風來雲吹散風去雲生復鋪海天池衲子笑雲忙坐臥看雲解自在一衲  
不洗三十春眼脂燭膩同一塵赤脚垢面齒如銀春芽凍米覆古甕破龕彌勒成主  
賓可憐雲構萬山窟天池大寺人能說祇今方丈卑田院風吹茅龍頂又缺苦行薰  
修畫閉關晡經食力筋骨頑護法雖無龍象力幸免托鉢供嘲訕世上伽藍騁鉅麗  
幡幢瓔珞菩薩蠻盜泉惡木污清淨豈如十指樵青山恨我俗緣世法未許一朝斷  
青鞋布襪行復趨塵寰

宿牯牛嶺雨不止明日下山賦詩別山靈

纔向匡山禮白雲山深雨瀑夜難分瀑流壞道雲封路難訪仙人鸞鶴羣  
五老雲中咳不聞香爐頂上濕氤氲離歌江上催人急五岳歸來再訪君

漢上琴臺

我登泰山獨走經石峪上有高山流水亭今朝引節漢陽縣出郭先訪琴臺銘鍾期  
伯牙二子已千載使我懷古心淒馨楚山何高高漢水清且深山水之間有真契相  
視莫逆於其心我思絲桐解人語陶令獨奏無絃琴此中會心不在遠拈花微笑真  
知音二子風流被江漢遂令湘楚多哀吟滄桑之際天晝陰貔貅萬竈烟塵侵風廊  
月榭館老革簫笳漢颺流江潯馬矢狼藉琴臺畔雖有勝蹟誰登臨我來櫟槍已掃  
蕩陂塘五月開煩襟月湖水作青銅鏡梅子山如碧玉簪滄浪漁父鼓枻去漢臯游  
女解珮尋臨流覓句一長歎惟有晨風鳴北林

漢陽晴川閣

江漢會朝宗晴川閣勢雄芳洲鸚鵡地急棹鯉魚風雪浪淘詩魄霞天潑酒紅名藩  
誇翼際放眼大江東

黃鶴樓



平楚山河一掌收  
謫仙人去我登樓  
英雄王霸思江表  
戰鬪風煙急上游  
手酌鸕鷀傾漢水  
脚翻鸚鵡戲滄洲  
浮雲劫火從頭換  
幾輩生兒似仲謀

岳陽城樓

樓高俯洞庭  
湘楚雨冥冥  
宮闕開龍藏  
江湖謫酒星  
水迎榔漲碧  
山背鄂來青  
莫說城如斗  
南天此建瓴

夜泊磊石山是湘江入洞庭處

湘水弔湘靈  
扁舟宿洞庭  
遙思二娥怨  
定繞九疑青  
七澤雲吞夢  
五湖水在瓶  
柁樓吹鐵笛  
慣有老蛟聽

嶽麓山放歌兼懷咸同中興諸老諸老多嶽麓書院弟子也

火維高山拔地九千丈  
尊卑差次七十有二峰  
南起回雁北衡麓  
潭州山水天下雄  
我棹清湘渡彼岸  
振衣直上雲麓宮  
高吟望湘亭  
遠見湘西諸山隱  
現雲霧中  
長沙烟火十萬戶  
樓臺雉堞斜陽紅  
下飲白鶴泉  
澆此塵煩胸  
愛晚亭前坐  
遐想可惜中



興諸老不再逢天之未喪誕英絕當時亦是卯角童我今短褐走天下模山範水僅有詩句工氣吞雲夢不足算且復浩歌長嘯登祝融

長沙起程赴衡山

雲夢澤南國吾行更向南仙雲低嶽麓冥漲下湘潭斑竹陰如畫山榴紅正酣衡疑渺何處蒼翠認烟嵐

衡山城外投山家宿

衡山負郭風景稀桑柘夕陰人叩扉水閣臨湘背嶽坐垂竿釣得鱖魚肥番茄鹽豉伴脫粟黃酒爲典風塵衣酒酣缺月上東嶺熨眼隔江看翠微衡陽艇子放江溜夜深掠過門前磯鐵笛驚起雁奴夢紅燈掉頭去若飛亂峰沈沈壓江重衡山負郭風景稀

上南嶽登祝融峯

離爲火爲日正位在朱方其神爲祝融摺笏南斗旁火維地荒幻蚩尤所遁藏軒轅

張鼓旗兵氣遂銷亡洞庭奏廣樂百靈趨走忙重華復來茲望秩休玉堂嗟哉綠雲  
間高塚祈連岡天柱東南傾神州返混茫維嶽佐禹功金簡賜琳瑯至今岫嶮尖碑  
文日月光嶽神正且直爲帝之紀綱朱鳥峙南宮翼若鸞與鳳罡風吹絕頂六月天  
雨霜鐵瓦蓋宮殿鬼火走長廊夜聞劍佩聲珠斗在我牀起登望日臺凜冽寒難當  
白雲如鴻濛重重蓋扶桑須臾龍吐珠萬山頭低昂吐吞山海間失足陷大荒珠沈  
海陰黑耳際風浪浪天雞久始鳴雲霞寶鏡妝赫曦上天東乃奪鵠火房登峯造峯  
顛尊卑無亂行祝融世公卿玉冊頒紫皇分野翼軫交天南所企望西柱東蓋峯文  
武相頡頏萬古正瞻視嶽色長青蒼登高四無鄰慨然想虞唐霸王一瞬息堯舜猶  
粃糠我行名山川盛夏泝衡湘題詩祝融頂作作寒有芒明當返東海去朝百谷王  
自祝融峯右轉入後山尋試心石因登會仙橋橋盡得羅漢洞皆奇絕賦詩題

石壁上

陰壑崢嶸石壁立如兜如鑿如劍戟如戶如門如斧劈如虎豹蹲鷹展翼如古層城

礮火劫欲塌不塌勢傾側一線懸崖石作級有欄可撫級可拾上爲羅漢洞下爲試  
心石心夷不駭路荆棘長嘯一聲如裂帛君不見會仙橋上題詩客

長歌呈尹金陽

乾秀

鍾山示我湖潭尹先生所著陰符經解義以爲當世君平之流旣入湘謁先  
生於長沙行年八十有面如紅玉鬚眉皓然日行八十里能服氣辟穀有  
時亦能豪飲謂我神仙中人可與入道心醉其言未能踐也少讀曾劼剛詩  
有題尹金陽蒼茫獨立圖不圖今日乃親笑語因贈一詩

學書學劍兩不成不如辟穀求長生青牛老子去函谷道妙強以言思名乾坤墨墨  
有死氣金陽夫子還丹成長沙一星位南極無乃朱鳥下降精雄王雌霸方圖爭竄  
卜垂簾無世情餐霞服蕊肌骨輕哀哉蒼生浩劫何時平

湘行出江大風雨作歌

衡湘之間十日九日雨我來雨過天開容上封寺裏夜伴南斗宿自誇福過昌黎翁



歸帆洞庭波浪穩袍袴暗汗天無風楊陵磯前萬木嘖雷聲動地雨塞空須臾螺洲  
突在眼江心漁子收釣箔桅燈夜上水天黑冥行大澤愁蛟龍浪阻船頭風塞戶水  
沒行囊雨打篷舟行膠灘觸沙嘴篙師撐折彎彎弓忽憶來時江上路鱗鱗細浪吞  
酒濃長江千里聘遐囑青山妙得晴霞烘豈知天賦命窮薄險難例須一度逢聽風  
聽水不復管夢驚百八蒲牢鐘簫洲已過漢陽近出險竟踣千萬峯殘雲亂走旗脚  
轉武昌城頭朝日紅火急覓醉酒樓上高吟鐵板琵琶銅

武勝關

橫雲楚塞鬱嵯峨爪徑修蛇穴嶺過怪道中原莽戈甲亂山無主夕陽多

九江得佩諍書明日舟中賦寄

葭菼茫茫路舟行盡日間大江橫素練細雨濕青山戍壘微茫際漁歌杳靄間寄聲  
招隱客倦鳥已知還

過采石磯寄題太白樓

青山如畫大江橫  
又向江頭殢客程  
氈帳昔聞胡飲馬  
錦袍今夢客騎鯨  
高樓萬古愁難寫  
明月當盃酒自傾  
爲問閉樓蕭尺木  
胸中五岳幾時平

題江都趙明湖

永年

隴上吟

函關西去幾郵亭  
度隴飄飄逐使星  
我羨明湖老居士  
吟鞭擊碎萬峯青  
一別臯蘭又幾年  
驚心河隴劇狼煙  
定知嗚咽秦川水  
不似江南菡萏天  
赴濟南夜車抵泰安  
城外岱宗壁立斜  
月墮嶺追思去年  
之游慨然有作  
魯道風塵挽葛衣  
戴星又聽堯南雞  
車箱夢折羊腸坂  
秦觀峯高月正低

大明湖

十載明湖夢裏經  
竭來人海著浮萍  
南風波浪生鱗甲  
北地山川見性靈  
隔舫酒襟花底碧  
滿城佛髻眼中青  
臨流一洗紅塵腳  
願向滄浪鼓釣舲

藏公詞一  
名小治浪

歷下亭

紅亭白舫酒生香  
海右琴樽此勝場  
唐宋百年多過客  
江山終古易斜陽  
荷風十頃

天如醉蕊雨三秋夢亦涼恨我適來當暑令萬蟬吟處綠陰張

灤源門外訪趵突泉

條支大卵春酒甕爛醉青泥壓頭重宛虹細度鍼芒隙須臾活活神泉送銅瓶汲井  
貯碧瀾鵝羽纖孔黃封穿以口吸水水箸立有似龍掛霄漢間般輪巧製噴水器水  
力升降相循環循環激水高屋角倒捲晴瀾散珠玉江南五月買陂塘酒醒人在欄  
干曲岱宗北來邱壑奔玉函龍洞青細縑佛山千丈跌平地舊時灤源今有門樓臺  
壓山山不勝地肺坼裂沙泉噴澄潭倒流三瀑布不與七十二泉相吐吞

巡按署建泉在其外

我思灤源著已久此泉不挂當時口詩聖詩仙有李杜壇坫齊盟推祭酒

濟南名泉七十二个

南豐循吏曾子固北渚寓公晁无咎坐對名泉無一語如入寶山空兩手豈知漢陰

丈人識抱甕奇製乃在唐宋後

泰和桓公十八年公會齊侯於灤水經註泉源上番水涌若輪與今所見如三噴泉者亦異

魚龍

曼衍多夸詞地下定有工倕師噴泉妙理矜創獲游戲三昧無人知我家江南煙水  
窟高花大柳芙蓉池網師名園許借宿黃塵走馬今何之渴羌箕踞作牛飲有舌不



辨澠與淄且看游魚吹細浪葛衣一解臨風吹

國樂家諸城王雨帆

露

留滯濟南訪之於學藝館不值因聽田英輝彈琴時余

將乘夜車南旋賦詩留別

禮壞樂崩聖所歎雅頌榛莽直至今我來岱北河濟陰聽子高山流水琴門外渴羌  
汗如濯搖窗萬竹多綠陰聲光閑淡有真意坐久如見姬孔心諸城王子失交臂含  
宮咀徵誰知音刺船有約過東海漫天風雪來相尋

渡淮口占

淮甸薰風動早涼坡陀莽莽散牛羊山榴紅過符離驛十丈車塵隔鳳陽

錦心贈墨答之以詩

我昨芒鞋踏碎匡廬烟采芝更上衡岳巔編詩不有黃山句負此滑笏玻璃鑒黃山  
老松高一尺炊松萬竈松爲泣夢尋黃山不可得得此黃山十挺松烟墨掃眉弟子  
有錦心遣我蒼璧珍球琳我書恨不工瘦金獨工瘦句爲長吟敲詩敲出琅玕音

膠澳

龍戰西雲爪向東二勞山下急秋風海隅客困聊城守壁上軍看鉅鹿攻樽俎傾危  
倭墮髻河山剽盜楚亡弓可憐一鑄遼東錯畫出葫蘆樣自同  
樓臺金碧照桑田覘國師來假道先鐵騎秋驕身毒士紙鳶風賽肉飛仙玃逢蠻觸  
橫尸地宮在修羅雨血天生怪田橫島畔客魯戈力盡寫降箋

送葉印濂

振宗

之官廣東

雪壓屋山冰墮釵紅鑪暖酒添濕柴夜吟擁被睡不穩朝來十指如籤排故人辭我  
嶺南去卻與征雁隨陽偕嶺南風物異諸夏冬不雨雪花滿街海帆浪舫狎鷗鳥貝  
玉無脛來天涯珠江畫舫閨絲竹蜚娘白足拖兩鞋手剝香橙點客酒海鮮入饌多  
蚌鮭我友平生富口福吏隱歷徧江與淮前年澄江閉閣臥河豚腹腴烹最佳去年  
彭城作司理查糕甜美供朝齋今年河朔大張飲黃塵喧汗兩袖揩定知明年風味  
好蕉實椰子摘滿懷男兒動足要萬里何用閑置如村娃行當挂帆逐君後崩厓不



用離傷乖所望新詩郵筒火急至日卜喜語攤牙碑







